

Apokalipisi

Ongú inde u ambamba ta e

Eli na kalanu

Djaa aye bhuku na Apokalipisi inde-e bhú nedhinga u adu ato mbolo li omakilisito lie kabula nabhuka bhú Yesu Kilisito maka Ngámá gba o. Engú na ngbéngbé inde bhú bhuku inde-e, Djaa ngapa pi okpála inde ngatatanga me u du ne nabhuka di ne masi. Djaa atsia aha líli pi uo me, u lu kpékpéke bhú 'ngú na kukulu nedhinga na likabhu di ne bhú onedhinga u ngato mbolo li uo lie-o.

Bhú bhuku inde-e, u aye bhúbhú ongú bhelé pindji nambamba ta ongú, di ne pindji nau ongú maka loto li da e nde kpékpéke ngú nambimbila. Engú na ngbéngbé bhúbhú-o mbámhá. A ko engú inde me: li pápá gba Kilisito Ngámá gba ní-e, a li soso-o, Ebhe ahá angu obhulu yala gba e hana, ani há di angu Satana . Ani há di makalá pi okpála na ngbingbili gba e, ne bisagu na abhúhá na mbia di ne doto na mbia inde ani ako angu e pí ndu 'ngú lie hana-o.

Ongbengbe ongú inde bhú bhuku inde-e ngae inde:

Eli na kalanu 1:1-20

Balua pi oDadjua mananika gba Ebhe 2 - 3

Malika 4:1 - 8:5

Ototi mananika 8:6 - 11:19

Nau ongú mananika maka loto 12:1 - 15:8

Okópo mananika na ke 'ngú gba Ebhe 16:1-21

Ongú mananika u apa e pindji babilona 17:1 – 19:10
 Nabu ta 'ngú pindji nau ongú mananika maka loto 19:11 – 21:8
 Yelusalema na mbia, ølø gba Ndili Kandølo 21:9 – 22:21

Lita 'ngú-o

¹ Bhuku inde-e ngakpokpo 'ngú pindji engú inde li Ebhe ambamba ta e pi Yesu Kilisito-o . Ebhe ambamba tata pi ani ngubula me ani suno pi obalise gba ni-o, engú inde améne lie mbia inde-o. Abhomu-o, Yesu Kilisito atsia atima andjelu gba e me ani mbamba ta engú ango-o pi bali gba ni Djaa . ² Djaa akpokpo ndu 'ngú inde ani au e hana. Ndu 'ngú inde ani au e hana-a, a ko 'li Ebhe, a ko la di kukulu 'ngú inde li Yesu Kilisito ambamba ta e pi ani-o. ³ A ko djali pi kpála inde ngatanga bhuku inde, ne obhende i ngadje ongú inde li Ebhe ambamba ta e bhúbhú-o, inde di ngakpata ongú inde aye lie bhú bhuku inde-o. Padhá de, anga nedhinga na ongú ango-o akolo masikpe.

Djaa yi okpála na oDadjua mananika gba Ebhe-e mayi

⁴⁻⁵ Ngama Djaa, ma atima balua inde-e bhú oDadjua mananika inde bhú ndu doto na Adjia-o.

A ayo me Ebhe inde uu inde adu nani uu, inde la di ngago-o, suno bádha bhú 'bu ne guo 'ngú gba e pi yi. A ayo di me obua mananika inde kala kiti na ngámá gba Ebhe-e, bhú dabili ne Yesu Kilisito suno bádha bhú 'bu ne guo 'ngú

pi yi. Yesu Kilisito-o, a ko kpála inde akpokpo ngbili 'ngú . A ko di kpála na kalanu inde azuku bhú ká okpála inde amu, a ko la di ngámá gba ongbengbe ongámási na doto.

Kilisito ngakunda ní, ani atsia agbegbe ní bhú osisiti 'ngú gba ní-e ne ngute e. ⁶ Ani amene me ní kolo okpála na Nau gba Ebhe . Ani amene di me ní kolo odimandø ngubula namene kulu liní pi Ebhe, 'Dyi ni. A ayo me sangu di ne angu du pi ani duduma ne duduma! A adu moko.

⁷ Yi tsitsia, ani ngago bhú ndindi!

Ndu okpála hana aú ani,
belegu obhende adu nani kala ani ne mandambi-o.

Ndu opiga inde píla doto libhomu adú bhú 'gbá li 'ngú gba ani-o.

Heni, a adu moko!

⁸ Ebhe Ngámá Apí 'Kpí apa me: «Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana.» Ebhe ne Kpála inde uu, Kpála inde adu nani uu, Kpála inde di ngago.

Djaa au Kilisito bhú 'he maka loto

⁹ Ngama Djaa, ma ne ndai yi inde ngakobho bhú dabili bini ne yi bhú likabhu, ne bhú Nau ne nazi kekele bhú nabhuka Yesu. Ngama-a, ma du nako bhú kpata bhú kpøme inde u a'i e me Patemosi kabula 'li Ebhe, la di anga ma ngakpokpo kukulu 'ngú inde li Yesu ambamba ta e-o. ¹⁰ Bhú 'kpí gba Ngámá-a, Bu Bhobua abedhe ma, ma atsia adje ne akele ma kpéke eli bini maka mbala. ¹¹ Eli ango-o apa me: «Ehe inde mu ngau e-e, ye bhú bhuku bini, amba mu tima bhú

oDadjua mananika gba Ebhe inde bhú Efeso, bhú Similine, bhú Pelegame, bhú Tiatile, bhú Salade, bhú Filadelefi ne bhú Laodisé.»

¹² Abhomu-o, ma adji lima ngú natsia kpála inde adu nagama 'ngú muma-o. Ma adji lima lie, ma au otala na olo mananika. ¹³ Bhú ka otala ango-o, ehe bini adu maka kpála-kuti. Ani adyi 'ndjá bongo akolo bhú 'dhu e, ani atsia agbite mbulu e ne mukabha inde u amene e li olo.† ¹⁴ 'Ndji ani ne sundjo ani avu má tuu, maka kato! Djila ani adu nade maka zi djua. ¹⁵ 'Dhu ani adu nasu maka kalase na kpéke mase inde u ato e bhú djua, zizi atsia aholo nasu. 'Li ani adu maka tolo wowo 'ngu. ¹⁶ Ani aholo ikupala mananika ne 'kpa e na kokpa. A adu akoto bhú 'bhø ani ne mbotia inde adhe ne ndu pasu bhisi hana. Bhúla ani adu asu maka kpéke zindjila na tulukpe.

¹⁷ Ma au ani lie, ma ati bhú li 'dhu ani maka kpála inde akpi. Pipita-a, ani a'o 'kpa e na kokpa-a pí ma, ani atsia apa muma me: «Mo okpé-e de! Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana. ¹⁸ Ma la di bhú mukobho. Ma adu nako me ma nde akpi, la mbia inde-e, ma bhú mukobho na duduma. Ma ne angu pí 'ndji kuo di ne pí 'ndji bili gba okpála inde amu. ¹⁹ Kaka-a, ye ongu inde mo ou e inde. A ko ongu inde ngakodho 'kpí, di ne ongu inde a ayo me ago pipita ko. ²⁰ Pindji oikupala mananika inde mo ou e sa 'kpa ma na kokpa, di ne otala mananika na olo-o, gbo nga 'dje mu, ma mbamba kukulu tata-a pí mu.

† **1:13** 1:13 Tsia bhú Dan. 7:13.

Mbila me, oikupala mananika-a, a ko oandjelu na oDadjua mananika gba Ebhe, otala mananika-a, a ko oDadjua mananika gba Ebhe-o.»

2

Balua pi okpála na Dadjua na Efeso

¹ Kpála inde ma au e apa matá muma me: «Ye balua pi andjelu na Dadjua na kuti na Efeso me:

«Kpála inde aholo oikupala mananika sa 'kpa e na kokpa, inde ngadholo bhú ká otala mananika na olo-o apa me: ² Ma mbila okulu gba mu-o hana. Ma mbila hana me mo omene kulu kpekpeke, me mu di ne bua na kekele. Ma mbila hana me mu tí da naziba osisiti okpála de. Ma mbila hana me mo ole okpála inde ngapa me o ne obhulu titima gba ma-a me u nde la mo-o ade-e, mo atsia au me a ko obhulu eu. ³ Ma mbila hana me a bhú mu ne kekele, mo osia likabhu ngubula 'li ma, mu tsia ndala de.

⁴ La-a, siti 'ngú inde ma au e li pabili gba mu-o, a ko me mo o'o ká mukunda inde mo okunda nani ma ne e a'o. ⁵ Kaka-a, bhundja nga bili inde mo oti li e-o. Dji bua mu, amba mu mene okulu maka mo odu nako namemene lie kalanu ko. I du mo-o de-e, ma ago li pabili gba mu, ma a'é tala gba mu li bili i nde li e-o, i du me mu nde dji bua mu de ko. ⁶ Engú bini, bádha 'ngú inde bhú mu-o ngae inde: mu ngayala okulu inde li oNikolaite ngasuno e, maka ngama makpe di-e, ma ngayayala lie-o.

⁷ A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomu-o, ma ahá lí ndula na mukobho inde bhú edyi gba Ebhe-e pi ani me ani du nazuzu. Edyi angu-o bhú kuti na mundayi gba Ebhe-o.»

Balua pi okpála na Dadjua na Similine

⁸ Kpála inde ma au e apa matá muma me: «Ye balua pi andjelu na Dadjua na Similine me:

«Kpála inde akpo lita ndu 'ngú hana, inde di abú ta ndu ongú hana, Kpála inde akpi nani, engú bini atsia azuku-o apa me: ⁹ Ma mbila likabhu gba ma di ne ndibhili gba mu-o hana, engú bini, kukulu tia mangbo ngae inde ka mu-o. Ma mbila la di maka li okpála inde ngapa me o ne omaYuda me u nde ne omaYuda ade-e, ngadi ma lie hana. La ngauo-o, a ko omaYuda de, a ko okpála gba Satana ! ¹⁰ Mo odjé tsulu ka likabhu inde mo osía e de. Djedje nga, djabulu andi okpála bini bini bhú ká yi bhú tikpu ngú nale yi. U ató mbolo li yi ngubula ekpi ndjikpa. Mo oyála ma de, abana i yo bha me u bhele mu. Pipita-a, ma ahá ndata na 'ngbe ndua pi mu maka makalá gba mu-o. Ndata na 'ngbe ndua angu-o, a ko mukobho na duduma.

¹¹ A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomu-o, ani sia likabhu gba nakpi na bhisi-e belegu de bini.»

Balua pi okpála na Dadjua na Pelegame

¹² Kpála inde ma au e apa matá muma me: «Ye balua pi andjelu na Dadjua na Pelegame me:

«Kpála inde ka e ne mbotia inde ngadhe ne ndu pasu bhisi hana-a, apa me: ¹³ Ma mbila bili inde mu ngadu li e hana, bili angoo, Satana ne ngamá oo ngae. Mu ngalila 'li ma. Mu ndala 'kpa li nabhuka gba mu bhú ma-a de, abana bha li nedhinga u abhelo Atipasi lie agba yi, li bili li Satana ngadu li e-o. Atipasi adu nani nakpokpo 'ngú gba ma mbámbá kala okpála.

¹⁴ La-a, siti 'ngú inde ma au e li pabili gba mu-o, a ko me, a agba mu ne okpála koko inde ngadhedhe li 'ngú li Balama adu nani nasuno e pi Balaka-o. Balama adu nani nasuno pi Balaka me ani to omafalaele bhú siti 'ngú. Ani adu apite uo me u zu oenu inde u aha o pi oebhe na eu, amba u du di nakunda olisi, i du di-e obhosi ngangá. ¹⁵ A bhadi moko, a di bhú ká okpála gba mu-o ne obhende adhedhe li nasuno siti líli maka oNikolaite ngasusuno lie-o. ¹⁶ Kaka-a, dji bua mu. Padhá de, anga i du mo-o de-e, ma ngago agba mu má gala, ma tsia gú okpála angoo ne mbotia inde ngakoto bhú 'bhø ma-o.

¹⁷ A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomu-o, ma ahá mana inde awo lie mawo-o pi ani. Ma ahá la di linga pi ani. U aye pí linga angoo 'ili na mbia

inde li kpála bini mbila ta e de, bha bini kpála inde asia linga ango-o ko!»»

Balua pi okpála na Dadjua na Tiatile

¹⁸ Kpála inde ma au e apa matá muma me: «Ye balua pi andjelu na Dadjua na Tiatile me:

«Ndili gba Ebhe inde li Djila e ngade maka djua, li zi 'dhu e nde ngasɛ maka kalase na kpéke mase, apa me: ¹⁹ Ma mbila okulu gba mu-o hana. Ma mbila mukunda gba mu-o hana. Ma mbila nabhuka gba mu-o hana. Ma mbila kulu mo omemene e pi okpála di ne kekele gba mu-o hana. Ma mbila hana me kulu mu ngamene e mbia inde-e ane bhe na kalanu-o ne bhelé. ²⁰ La-a, siti 'ngú inde ma au e li pabili gba mu-o, a ko me, mu ngaziba Djedjabele, eɛ inde ngapa me ni ne polofeta gba Ebhe-o. Ani ngapite obalise gba ma-a ne nasuno pi uo engú na zabhe, di ne nazɛ onu inde u aha o pi oebhe na eu-o. ²¹ Ma a'o nako nedhinga pi ani me ani dji bua e. Engú bini, ani kunda nadji bua e de me ni 'o nakunda obhosi ngangá ma'o-o de.

²² Kaka-a, ma agú 'i ani pí polo na 'ngbé likabhu bhú dabili bini ne obhende ngakunda obhosi, i du di-e olisi gba okpála koko bhú dabili bini ne ani-o, i du me okpála ango-o nde dji 'ngbu o li sisiti kulu gba ani de-o. ²³ Ma abhili okpála inde ngakpata nganda ani-o, li ndu okpála na oDadjua gba Ebhe-e hana mbila me ma ne kpála inde i ngambila mabhundja di ne gumu gba okpála hana. Ma ahá pi kpála ne kpála bhú ká yi makalá nakpata bha lele siti

'ngú inde aní amene e ko. ²⁴ La ngayi okpála na Dadjua na Tiatile, inde i dhedhe li nasuno na sisiti bhomu-o de-e, inde i kpata di engú li okpála bhomu-o nga'i e me, "Engú nawo mawo gba Satana" de-e, ma ne líli koko na'o'o pí yi ade. ²⁵ Engú bini, yi dhedhe bha li engú inde ka yi akólo bha bini li 'kpí inde ma agó lie ko.

²⁶⁻²⁸ Kpála inde agbóko 'gú bhomu-o, inde alíla okulu gba ma nakolo alí soso-o, ma ahá pí aní angu inde ma asia e ngama makpe ka 'Dyi ma-o. Ma a'ó aní ngámá pí 'ndji opiga. Aní aú ngámá pí 'ndji uo. Aní ahólo kalase sa 'kpa e, aní tsia dú agugumu uo maka u agugumu omadakpa lie ko.† Ma ahá di ikúpala inde asusu kèkpí-e pí kpála ango-o ngú nasuno me aní agboko 'gú-o agboko.

²⁹ A ayo me kpála inde li e ne djedje-e, dje engú inde li Bu Bhobua ngapa e pí oDadjua gba Ebhe ko!>>

3

Balua pí okpála na Dadjua na Salade

¹ Kpála inde ma au e apa matá muma me: «Ye balua pí andjelu na Dadjua na Salade me:

«Kpála inde li obua mananika gba Ebhe, di ne oikúpala mananika nde ka e apa me: Ma mbila okulu gba mu-o hana. Okpála ngapa me mu uu, engú bini, mo okpi. ² Zuzuku, mene ne kpeke me mo obulu bha má pii de! Padhá

† **2:26-28** 2:26-28 Tsia bhú Ets. 2:8-9.

de, anga ma au me kulu gba mụ-o kolo nga li lelele de. ³ Kaka-a, bhundja nasuno inde mo osia nani e-o ne lele maka mo odje nani lie-o. Dji bua mụ, amba mụ lila nasuno ango-o malila! Ɔ dū la me mụ nde zụkụ de-e, ma gó maka bhulụ 'zi, ma kóto li mụ bhú gbilikiti, me mụ nde mbila nedhinga ango-o de.

⁴ Engú bini, a bhú ka yi okpála na Salade ne okpála bini bini inde i siti obongo gba o-o de. U adyí obongo na bububu, ngaya ne uo-o, ya tsia dhólo bhú dabili bini. Padhá de, anga u ati ne nadhukụ ne ma bhú dabili bini ngao. ⁵ A moko, kpála inde agbóko 'gú bhomụ-o, adyí obubu bongo. Ma búlụ 'li ani bhú bhuku na mukobho-o de. La di-e, ma azíba kala 'Dyi ma, di ne kala oandjelu gba ani-e me, a ko kpála ka ma.

⁶ A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!>>

Balua pi okpála na Dadjua na Filadelefi

⁷ Kpála inde ma au e apa matá mụma me: «Ye balua pi andjelu na Dadjua na Filadelefi me:

<Kpála inde bubu, inde i papa eu de, inde li fungula gba Davidi nde ka e-e, inde i 'u bhoti-e, kpála bini ti da nanini de, inde i ni la di bhoti-e, kpála bini ti da na'u'u de-e, apa me:

⁸ Ma mbila okulu gba mụ-o hana. Ma mbila hana me mụ kpékpéke ade. La-a, mo olila 'li ma ndjindji. Mo opa mbámbá me mụ ne kpála ka ma. Kaka-a, ma a'u bhoti kala mụ, bhoti ango-o, kpála bini ti da nanini de. ⁹ Tsia nga

engú inde ma améne e li okpála gba Satana , obhulú eu inde ngapa me o ne omaYuda me a nde omaYuda ade-o: ma agbéle uo kala mụ, u tútú lipukú o kuto kala mụ ngú nadhögö mụ, amba u mbila me ma ngakúnda mụ. ¹⁰ Mo olila líli gba ma pìndjì naholo bua o ndjìndjì. Kaka-a, ngama di-e, ma alíla bhadi mụ moko li nedhinga na kpéke da 'ngú inde agó píla doto libhomu ngú nale okpála na doto ko. ¹¹ Ma agó mbia! Dhedhe li nasuno inde mo odje e ndjìndjì, ngubula me kpála bini adhépe ndata na 'ngbè ndua gba mụ-o de.

¹² Kpála inde agbóko 'gú bhomú-o, ma a'ó ani maka nepanda bhú 'ngbé 'ti Ebhe gba Ebhe gba ma-o. Ehe bini ti da nagbe matá ani oo belegu de bini. Ma ayé 'li Ebhe gba ma-a li kute ani, bhú dabili bini ne 'li gúdhú gba Ebhe gba ma-o. Gúdhú ango-o, a ko Yelusalema na mbia inde ayíe abhúlá, inde li Ebhe atíma galikpe e-o. La di-e, ma ayé 'ili gba ma na mbia li kute ani.

¹³ A ayo me kpála inde li e ne djedje-e, dje engú inde li Bu Bhobua ngapa e pí oDadjua gba Ebhe ko!>>

Balua pí okpála na Dadjua na Laodisé

¹⁴ Kpála inde ma au e bhomú-o atsia apa muma li soso me: «Ye balua pí andjelu na Dadjua na Laodisé-e me:

«Kpála inde 'li e me "A dū moko", kúkulu kpála inde ngakpokpo 'ngú me ani nde 'o koko pépé de-e, inde lita ndū 'he li Ebhe abho e hana-a apa me: ¹⁵ Ma mbila okulu gba mụ-o

hana. Mụ kpikpina ade, mụ di kpákpá ade. A ayo iginí me mụ de adu kpikpina, i du mo-o de-e, mụ du kpákpá. ¹⁶ I nde lie me mụ nde yapayapa-a, mụ nde kpikpina adi-e, mụ la di kpákpá adi-e, ma azíe mụ mazie!

¹⁷ Mụ ngapa me: “Ma ne bhulu tia, ma asia tia bhelé, ma ne gumu 'he belegu ade bini.” Engú la bini, mụ mbila de me ni bhú likabhu-o de. Mụ mbila de me ni nga'o li ma ndjinga-a de. Mụ mbila de me ni ne bhulu ndibhili-e de. Mụ mbila de me ni u 'kpí de-e de. Mụ mbila la di de me ni ndumbu-o de. ¹⁸ Kaka-a, ma ngayo ka mụ me, a ayo nakala olo inde li djua aleke e ndjindji-e ka ma, ngubula me mụ kolo bhulu tia. Ma ngayo ka mụ me, a ayo nakala di obongo na bububu ka ma ngú nadyidi li kute mụ, amba nümü améne mụ ka ndumbu gba mụ-o de. Ma ngayo ka mụ me, a ayo nakala la di elá ngú nasese bhú djila mụ, amba mụ du au 'kpí ndjindji.

¹⁹ La pí ma-a, ndu okpála inde ma akukunda o hana, ma ngambe bhú 'ndji uo, ma di ngasuno oehe inde u mene e ndjindji de-e pí uo. Kaka-a, a ayo me mụ dji bua mụ, amba mụ du kpákpá. ²⁰ Djedje nga, ma ala li 'bhø bhoti-o, ma ngabhibhi. Li kpála dje 'li ma, ani 'u 'bhø bhoti-e, ma lí agba ani, li गया ne ani-e, ya tsia zú 'he ne ani bhú dabili bini.

²¹ Kpála inde agbóko 'gú bhomu-o, ma aziba pí ani nadu bhú dabili bini ne ma pí kiti na ngámá gba ma maka ngama di ma agboko 'gú lie, ma atsia adu bhú dabili bini ne 'Dyi ma pí

kiti gba e na ngámá ko.

²² A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!>>

4

Abhúlá-a, ndu okpála hana ngadhөгө Ebhe

¹ Pipita-a, ma au engú koko bhú 'he maka loto. Ma au bhoti inde adu baba abhúlá.

Eli ma adje igini e kalanu mugito me u nga'u toti-e, apa muma me: «'E ei, amba ma suno engú inde ngago sidi-e pi mu.»

² Kolo me-e, Bu Bhobua abedhe ma. Abhúlá oo, kiti bini na ngámá adu oo, kpála bini atsia adu pépé. ³ Zi kpála ango-o adu nasu maka oteme* na zizi. Makilima asa dengo kiti na ngámá inde ani adu pí e ne zi e ngbalina. Zizi adu di maka zi teme na zizi. ⁴ Okiti na ngámá ndjikpa bhisi ne ká badha asa dengo kiti na ngámá ango-o ngbalina. Obhelesi okpála ndjikpa bhisi ne ká badha atsia adulu pépé. U adyidyi obubu bongo , u atsia adyidyi ondata na ngámá inde u amene e li olo-o bhú 'ndji o. ⁵ Li bili li kiti ango-o adu lie, ekpi adu andjendjengene, mugbalá adu asusula. O'i 'ke mananika inde adu atsi matsi adu kala kiti ango-o. O'i 'ke ango-o, a ko obua mananika gba Ebhe-o. ⁶ Kala kiti ango-o, ma au 'he bini maka 'ngbé 'ngu inde li píla e adu nasu má

* **4:3** 4:3 Oteme: Bhú eli na giliki-e, u aye limbi oteme bata: djasepe, saladuane ne emelode.

ngingingi maka bitolobi. A adu má ngilili maka teme† na zizi.

Lingo kiti na ngámá ango-o, okpála badha na ngangamba‡ adu oo. (A akunda napa me sunda kiti na ngámá di ne bili li obhelesi okpála ndjikpa bhisi ne ká badha adu lie-o.) Djidjila abedhe li bhúla uo di ne li 'ngbu uo bedhe. ⁷ Kpála bhe na bini-e, adu maka kingbi. Bhende na bhisi-e, adu maka folo bagala na bhobhoko. Bhende na bata-a, bhúla ani adu maka kpála-kuti. Bhende na badha-a atsia adu maka ndua inde bhú holo. ⁸ Ndu uo badha hana, u adu ne mbumbudha madhia madhia. Djidjila atsia abedhe tété bedhe bedhe, ali ngbungbu di ne asabusabu. U ngali 'tsi sukpe ne ngbikpi mandi nago me:

«Ebhe Ngámá Apí 'Kpí, Bubu, ani Bubu, ani Bubu.

A ko Kpála inde adu nani uu, inde uu, inde di ngago!»

⁹ Ndu nedhinga hana li okpála badha bhomu-o ngali 'tsi ngú nadhögö kpála inde adu pí kiti na ngámá, kpála inde la di bhú mukobho duduma ne duduma, u ngaha sangu di ne nagie heni pi e lie, ¹⁰ obhelesi okpála ndjikpa bhisi ne ká badha-a ngatutu lipuku o kuto kala kpála ango-o. U ngadhögö kpála inde bhú mukobho duduma ne duduma-o. U ngapandja ndata na ngámá gba o-o, u ngabubu kala kiti na ngámá-a ne napa me:

† 4:6 4:6 Teme: Bhú eli na giliki-e, u aye me «Teme na kilisitale.»

‡ 4:6 4:6 Okpála badha na ngangamba: Li bili inde-e, u mbila de me ne me a ko okpála-kuti, ne me a ko oandjelu-o de.

11 «Ebhe Ngámá gba ya, mo oti ne napa me
 okpála toko mụ, u dhөгө mụ,
 amba mụ sia sangu kabula ngámá gba mụ-o.
 Padhá de, anga mo obho ndụ 'he hana ngamụ.
 A atsia amene lie,
 anga mo okunda nanì me a amene lie moko.»

5

*Ndìli Kandөлө-o abhúlu 'kpá balua inde aga-
 gala lie magagala-o*

¹ Pipita-a, ma au 'kpá balua bini sakpa kpála inde adụ pí kiti na ngámá-o, anì aholo lị pá 'kpa e na kokpa. U aye 'he pépé ne ndụ pasụ bhisi hana. U agagala, u atsia ayele ne malika lị obìlì mananika. ² Abhomụ-o, ma au andjelu bini na angu inde adụ asusula me: «A tì da nasosoko malika lị kute 'kpá balua inde-e ngú nabhubhulu-o da?» ³ Engú bini, kpála bini inde atì da nabhubhulu di ne natsia 'kpí bhúbhú-o dụ de, abana abhúlá, abana píla doto, abana asa doto. ⁴ Kaka-a, ma aku 'gbá naali, anga kpála inde atì da nabhubhulu di ne natsia 'kpí bhúbhú-o dụ de. ⁵ Engú bini, sụka obhelesi okpála apa mụma me: «Mo okú 'gbá de. Tsitsia nga, kingbi na piga gba Yuda, ndìli gba 'ngbé ngámá Davidi-e agboko egú-o agboko. Anì tì da nasosoko malika mananika bhomụ-o, anì tsia bhúlu di 'kpá balua ango-o.»

⁶ Abhomụ-o, ma au Ndìli Kandөлө bini alụ tụtụ, lị bìlì na kiti na ngámá-o. Okpála badha na ngangamba bhú dabìlì bini ne obhelesi okpála-a asa anì ngbalina. Anì adụ mụgìto me u akodho

ngulu ani makodho. A adu bhú 'ndji ani ne odidi mananika di ne djidjila mananika. Odjidjila mananika bhomu-o, a ko obua mananika gba Ebhe li ani atima o píla doto libhому-o.

⁷ Ndili Kandөлө-o ago, ani atsia aha 'kpá balua sakpa kpála inde adu pí kiti na ngámá-o. 'Kpá balua ango-o adu sakpa ani li pápá na kokpa.

⁸ Nedhinga ani aha 'kpá balua lie, okpála badha na ngangamba di ne obhelesi okpála ndjikpa bhisi ne ká badha-a, atuko ne lipuka o kuto kala Ndili Kandөлө-o. A adu sakpa ndu uo bini ne bini hana ne dumu di ne kópo na olo inde abedhe ne bandele bedhe. Bandele ango-o, a ko mayo gba okpála gba Ebhe-o. ⁹ U adu nali etsi na mbia me:

«Mu ti da naha 'kpá balua-o
 ne nasosoko malika ango-o,
 anga u abhөлө nani mu,
 mo otsia agbegbe okpála inde adu bhú bali-e
 ne ngute mu pi Ebhe.

A ko okpála na ndu bili hana,
 ne ndu opiga hana,
 ne ndu okongú hana.

¹⁰ Mo otsia amene me
 u kolo pi Ebhe gba ní-e okpála na kuti-ngámá
 gba ani,

u kolo di odimandө pi ani,
 u tsia u píla doto.»

¹¹ Pipita-a, ma au, ma atsia adje 'li bhiti oandjelu. U adu nani okөтө ne kөтө. U alulu dengo kiti na ngámá-o, ne dengo okulu 'he badha-o, di ne dengo obhelesi okpála-o. ¹² U adu asusula kpekpeke me:

«Ndili Kandøle nani inde u abhøle e
 ati ne nasia sangu ,
 ani ati ne nasia tia, ne imbilangu, di ne ngámá.
 A ayo me okpála toko ani,
 u manga ani.

A ko kpála na angu.»

¹³ Ma atsia adje di ndu ohe na píla doto libhomu
 ne ohe na abhúlá ne obhe na sa doto, ne obhe na
 abhú 'ngu-o hana aholo nali etsi me:

«A ayo me dũdũma ne dũdũma ní toko,
 ní dhøge, amba ní ha di sangu ne ngámá pi
 kpála inde

ngadu pí kiti na ngámá-a

bhú dabili bini ne Ndili Kandøle-o.»

¹⁴ Okpála badha na ngangamba-a adu abhuka
 engú u adu apa e bhomu-o me: «A adu moko!»
 Obhelesi okpála atsia adu atutu lipuku-o kuto
 kala kiti na ngámá ne nadhøge Ebhe bhú dabili
 bini ne Ndili Kandøle-o.

6

*Ndili Kandøle-o aholo nasosoko omalika
 mananika li kute 'kpá balua-o*

¹ Abhomu-o, ma atsia 'kpí, ma au Ndili
 Kandøle-o asoko sũka omalika mananika li 'kpá
 balua-o. Ani asoko lie, ma adje sũka okpála
 badha na ngangamba-a ngagama 'ngú kpékpéke
 mũgito me mũgbálá ngasũsula ngae. Ani me:
 «Gogo!» ² Ma me ma tsia 'kpí me-e, ma au punda
 bini na bubu akoto. A adu sakpa kpála inde adu
 pí ani-e ne adili. U ato ndata na ngámá bhú 'ndji

ani. Ani anu maka kpála inde agboko 'gú ngú nagboko matá egú koko.

³ Nedhinga ani asoko malika na bhisi-e lie, ma adje kulu 'he na bhisi-e apa me: «Gogo!»

⁴ Abhomu-o, li punda koko akoto lie-e, kute ani ambe maka djua. U aha pi kpála inde adu pí ani-e angu na'e guo 'ngú píla doto ngubula me okpála bhili lio. U atsia aha di pi ani mbotia na ndjándjá.

⁵ Li Ndili Kandøle-o asoko malika na bata lie, ma adje kulu 'he na bata-a apa me: «Gogo!» Ma me ma tsia 'kpí me-e, ma au punda na bibili. A adu sakpa kpála inde adu pí ani-e ne kilo. ⁶ Ma adje 'he mugito me kpála agama 'ngú bhú ká okpála badha na ngangamba-a me: «Li kpála mene kulu ekpí bini libhomu-o, ani de sia tia inde i ti da nakala bha bini koli kilo na ngano bini, i du mo-o de-e, ani de sia tia inde i ti da nakala bha bini koli kilo na olodje bata.* Engú bini, vino ne emu-o adúla lie de.»

⁷ Li Ndili Kandøle-o asoko malika na badha-a lie, ma adje kulu 'he na badha-a apa me: «Gogo!» ⁸ Ma me ma tsia 'kpí me-e, ma au punda na 'ngu kpadhi. A adu 'li kpála inde adu pí ani-e me «kuo.» Bili gba okpála inde amu-o adu li 'ngbu ani. U aha nani angu pi uo ngubula nabhili té okpála na píla doto. I du me okpála nde badha-a, u bhéle kpála bini bhú ká uo. U abhili té okpála bhomu-o ne egú, ne gumu, ne okuo di ne onute.

* **6:6** 6:6 Bili inde si-e akunda napa me adyindi adu naali. Mase ezu akpéke na kuo kuo.

⁹ Li Ndili Kandələ-o asoko malika na bhuluvue lie, ma au bua okpála inde u abhili nani o sa misa natsulu enu pi Ebhe-o. U abhili nani okpála bhomu-o ka anga u abhuka 'li Ebhe, u atsia akpokpo di mbámá. ¹⁰ U adu asusula kpekpeke me: «Ngámá na bubu, mu ne kukulu ngámá ngamu. Mu ngadjeke ni ngu nakodho 'ngu sunda ya ne okpála na doto-o? Ngauo, u abhili nani ya. Kodho 'ngu bhomu-o kokodho, amba mu 'o 'ngu pi uo.» ¹¹ Abhomu-o, u aha pi ndu uo hana bini ne bini lobe na bubu. U atsia apa pi uo me: «Yi djeke nga mbo bedi, alo gba yi-e le nga de. A ne ondaise yi koko inde ngakpata nganda Ebhe. A ayo me okpála na doto bhili nga di uo maka u abhili nani yi lie ko. Pipita-a, u tsia kódho 'ngu gba yi ne uo bhú dabili bini.»

¹² Pipita-a, ma au Ndili Kandələ-o asoko malika na madhia-o. Abhomu-o adjigidjo na ngbéngbé amene lie. Ela abili bhúla e má mbilili maka bongo na pili. Epe libhomu atsia andju má ngua maka ngute. ¹³ Oikupala ayie abhúlá, abala kuto maka lí 'lá bhe i mbe de-e ababala lie ka kpéke anvi-o. ¹⁴ Kokpi angita maka 'kpa balua inde u agagala e magagala. Ndu oeta hana ne okpeme hana ayie bhú dá o. ¹⁵ Ongbengbe ongámasi na doto, ne ongbengbe okpála, ne ongbengbe ongámasi na sudha, ne obhulu tia, ne okpála na angu di ne ndu okpála koko hana, obalise ne okpála inde bhú bali ade, ndu uo hana awowo lio bhú ogudho teme ne bhú oeta. ¹⁶ U aholo apa pi oeta di ne pi ongbengbe teme me: «Yi bala pi ya, amba yi wo ya tsutsu. Yi wo ya me kpála

inde adu pí kiti na ngámá-a aú ya de. Yi wo ya ka kpéke ke 'ngú gba Ndili Kandelø-o. ¹⁷ Padhá de, anga 'ngbé 'kpí na ke 'ngú gba uo akolo. A ti da nalɔ kakala da?»

7

Okpála kutu kámá bini ne ndjikpa badha ne ká badha

¹ Pípita-a, ma au oandjelu badha, u nde alulɔ li odje doto badha hana. U adu ayoko me anvi bini apé pí doto, i du di-e pí 'ngbé 'ngu ne pí ondula de. ² Abhomɔ-o, ma au andjelu koko bini ayie ne andjongu. A adu sakpa ani ne kasé gba Ebhe na u-o. Ani asula ne angu hana pí oandjelu badha inde li Ebhe aha nani angu nabhili doto pí o bhú dabili bini ne angu nasiti 'ngbé 'ngu-o pí o me: ³ «Yi abhíli nga doto ne ondula padhá de. Yi asíti nga di 'ngbé 'ngu padhá de. Yi djeke nga me ya tu kasé pidi obalise gba Ebhe gba ní-e paká.»

⁴ Ma atsia adje alo gba okpála inde u atɔ kasé lio-o. A adu okpála kutu kámá bini ne ndjikpa badha ne ká badha bhú ndu opiga gba omaɪsalaele hana. ⁵ Bhú piga gba Yuda, okpála bhe u atɔ kasé lio-o adu okpála kutu ndjikpa ne ká bhisi. Bhú piga gba Lubeni-e, okpála adu kutu ndjikpa ne ká bhisi. Bhú piga gba Gada-a, okpála adu kutu ndjikpa ne ká bhisi. ⁶ Bhú piga gba Asela-a, okpála adu kutu ndjikpa ne ká bhisi. Bhú piga gba Nefitali-e, okpála adu kutu ndjikpa ne ká bhisi. Bhú piga gba Manase-e, okpála adu kutu ndjikpa ne ká bhisi. ⁷ Bhú piga gba Simeona-a, okpála adu kutu ndjikpa ne

ká bhisi. Bhú piga gba Levi-e, okpála adu kutu ndjikpa ne ká bhisi. Bhú piga gba Isakala-a, okpála adu kutu ndjikpa ne ká bhisi. ⁸ Bhú piga gba Djabulona-a, okpála adu kutu ndjikpa ne ká bhisi. Bhú piga gba Djodjefu-o , okpála adu kutu ndjikpa ne ká bhisi. Bhú piga gba Bendjame-e, okpála adu kutu ndjikpa ne ká bhisi. U atu kasé li ndu okpála bhomu-o hana.

Libi okpála inde li Ebhe alo o-o

⁹ Pipita-a, ma atsia matá 'kpí, ma au bhiti okpála na bhibhiti inde li kpála bini ti da nako alo gba o-o de. A du okpála na ndu bili hana, ne ndu opiga hana, ne ndu okongú hana. U alulu kala kiti na ngámá di ne kala Ndili Kandøø-o . U adyidyí olobe na bububu, adu sakpa uo ne okpá ngulu. ¹⁰ U adu asusula ne angu o hana me:

«Mukobho ngayie ka Ebhe gba ní
inde adu pí kiti na ngámá-o,
di ne ka Ndili Kandøø-o!»

¹¹ Ndu oandjelu hana alulu denko kiti na ngámá-o, ne denko obhelesi okpála di ne denko okpála badha na ngangamba-o. U atutu bhúla o ne kuto kala kiti na ngámá-o, u atsia adhøø Ebhe. ¹² U adu apa me:

«A adu moko!

A ayo me okpála toko Ebhe gba ní-o.

A ko Ebhe na sangu,
a bhú ani ne imbilangü.

A ayo me okpála gie heni pí ani, u manga ani.

A ko Ebhe na angu.

Ani kpekpeke, duduma ne duduma!

A adu moko!»

¹³ Suka obhelesi okpála bhomu-o ayi ma me: «Okpála inde adyi obubu lobe-e, a ko oda? U ayie la di su?» ¹⁴ Ma agie pi ani me: «Bhele kpála-a, mu mbila hana.» Ani atsia apa mama me: «A ko okpála inde apu bhú 'ngbé likabhu na ngbéngbé-o. U avulu olobe gba o-o, u atsia aleke ne ngute Ndili Kandele-o ngubula me akolo bubu.

¹⁵ Ka 'ngú angoo, u alulu kala kiti na ngamá gba Ebhe-o.

U ngamene kulu lio pi ani sukpe ne ngbikpi hana bhú 'ngbé 'ti gba ani-o.

Kpála inde adu pi kiti na ngamá-a adú bhú dabili bini ne uo ngú nalila uo.

¹⁶ U djé matá gumu belegu de bini, u djé di matá gumu 'ngu belegu de bini.

Ela, i du di-e mangua kpá bili dho-ie tsulu matá uo de.

¹⁷ Padhá de, anga Ndili Kandele inde alu kala kiti na ngamá-a adú

maka mulila gba uo ngae.

Ani ató bhula uo li bili li okpongu na mukobho nde lie-o.

Ebhe tsia kúo ngula sala uo hana.»

8

Ndili Kandele-o asoko malika na mananika-o

¹ Nedhinga li Ndili Kandele-o asoko malika na mananika-a lie, sukpe andjili abhulá má bulu, masakpe de miniti ndjikpa bata. ² Pipita-a, ma au oandjelu mananika inde alulu kala Ebhe-o. U aha ototi pi uo mananika.

³ Andjelu koko bini ago alu dengo misa natsulu mangotsi pi Ebhe-o. A adu sakpa ani ne saani

na olo ngú natsulu bandele. U aha bandele pi ani bhelé ngú napa me ani tsulu pi Ebhe bhú dabilì bini ne omayo gba okpála gba Ebhe-o. Ani tsulu pi misa inde u abho e li olo-o. Misa angoo adu kala kiti na ngámá-o. ⁴ Ngúwa bandele li andjelu-o adu atsulu e-e, a'e'e lie abhúlá bhú dabilì bini ne omayo gba okpála gba Ebhe, anu a'ú kala Ebhe. ⁵ Pipita-a, andjelu-o aha saani natsulu bandele-o. Ani abedhe ne djua inde adu oo-o, ani atsia abhike píla doto. Ekpí andjengene, mągbálá asula, adjigidjo adhika.

Ototi badha na kalanu-o asula

⁶ Abhomu-o, oandjelu mananika inde aholo ototi mananika-a aleke lio ngú na'u'u.

⁷ Andjelu na bini-e a'u toti gba e-o. Itimeli, ne djua bhú dabilì bini ne ngute abala píla doto. A tsia atsulu té doto di ne ondula. I du me u nde agbo bhusu doto di ne ondula hana bata-a, akunda napa me bini bhú káká atsulu bhomu-o ngae.

⁸ Pipita-a, andjelu na bhisi-e a'u toti gba e-o. Ehe bini maka 'ngbé 'ta djua ati bhú 'ngbé 'ngu. Engu agbo bhusu e bata, bhe bini-e atsia adjì lie ngute. ⁹ Té ndu 'he li Ebhe abho e hana inde ngadu abhú 'ngbé 'ngu, bhú dabilì bini ne ozabu-o atsia amu. U po bhúla ndu 'he inde li Ebhe abho e bhú 'ngbé 'ngu, u po di bhúla ozabu hana-a, u tsia gbo bhusu bhusu bata-a akunda napa me akpi bhomu-o ne bini bhú káká.

¹⁰ Abhomu-o, andjelu bhe na bata a'u toti gba e-o. 'Ngbé ikupala bini inde li zi e adu atsi maka zi 'ké na ngbéngbé ayie abhúlá, ati kuto. A atsia

ati pí té ongade 'ngu di ne okpongu-o. I dũ me u nde apo bhúla ongade 'ngu di ne ondjingu hana-a, u tsia gbo bhũsũ bhũsũ bata-a, akũnda napa me ati bhomũ-o pí bini bhú káká. ¹¹ A adũ 'li ikupala ango-o me «Ehe na sũsũ.» Abhomũ-o, té oengu-o akolo sũsũ. Bhelé na okpála inde andji-e atsia amu, anga akolo sũsũ.

¹² Pipita-a, andjelu na badha-a a'u toti gba e-o. A asũ té ela ne té epe di ne té oikupala. I dũ me u nde agbo bhũsũ ela ne epe di ne oikupala ne ndundundu bata-a, akũnda napa me a asũ bhomũ-o bini bhú ká ndũndũ hana. A atsia abili bhúla uo hana li pápá bini bini. Zi ngbikpi dũ matá nasũ libhomu de, abana di zi epe. I dũ me u nde agbo bhũsũ zi ngbikpi ne ndundundu bata, u gbo di bhũsũ zi epe ne ndundundu bata-a, akũnda napa me bini bhú ká ndũ uo bini bini hana dũ matá nasũ-ũ de.

¹³ Pipita-a, ma atsia matá 'kpí, ma adje ndua bini me ani nde ngakodho 'kpí abhúlá tsutsu naali. Ani adũ nasũsula me: «A ko likabhu! A ko likabhu! A ko likabhu pí okpála na doto li oandjelu bata bhe koko a'ú toti gba o-o lie ko.»

9

Andjelu na bhuluvue a'u toti gba e-o

¹ Abhomũ-o, andjelu na bhuluvue a'u toti gba e-o. Ma au ikupala bini ayie abhúlá, ati píla doto. U atsia aha lifungula na 'bhẽ tsu 'dú-o* pí ikupala ango-o. ² Ikupala bhomũ-o abhulu bhøbhø. Ngúwa bini akoto bhúbhú maka ngúwa

* **9:1** 9:1 Tsu 'dú: A ko bili inde li osisiti bua ngadũ li e.

na ndingidhi djua. Bhúla ela ne bhúla 'kpí atsia abili ka ngúwa ango-o má pi! ³ Omakilingbo aze bhú ngúwa bhomu, u atsia ayangba píla doto. U aha nani pi uo sili maka bhende gba oapekebhe. ⁴ U aha líli pi uo me u améne ulu sisiti de, u améne ondula sisiti de, u améne di ohe inde ngakø bhú doto sisiti de. Engú bini, u mene mangbo sisiti bha bini okpála bhende li kasé gba Ebhe-e nde pidi o ade-o. ⁵ U ha kpadji pi uo ngú nabhili okpála bhomu-o de, engú bini, u to mbolo li uo ngú epe bhuluvue. Mbolo ango-o adú ami li uo maka ngabhø apekebhe amimi lie me a nde adho kpála-o. ⁶ Bhú epe bhuluvue bhomu-o, okpála agili kuo, engú bini, u úu de. U adú ne gumu namu, engú bini, kuo akpé de uo tsutsu.

⁷ Omakilingbo bhomu-o adu maka opunda inde bedhe ngú egú. A adu pí 'ndji uo ne ehe maka ndata na ngámá inde u abho e li olo. Bhúla uo adu maka bhúla okpála-kuti. ⁸ Sundjo adu bhú 'ndji uo ndjandjandja maka sundjo olisi. 'Te uo adu maka ote okingbi. ⁹ Mbulu uo adu mugito me u adyi tété bongo na kalase. Gili mbudha uo adu au mugito me a ko gili bhiti opunda inde adji bhú 'gú. ¹⁰ A adu li uo ne soso maka 'so apekebhe, atsia adu bhúbhú ne sili inde u adu ato mbolo li okpála ne e ngabula epe bhuluvue-o. ¹¹ Ngámá gba uo adu ne andjelu na tsu 'dú. A adu 'li ani bhú eli gba omaYuda me: «Abadona.» Bhú eli gba oGiliki-e, a adu 'li ani me: «Apoliona.» A akunda napa me bhulu nabhøø kuti.

¹² Likabhu na bini-e akodho 'kpí akodho. 'E-e!

Likabhu koko bhisi matá ngago pipita.

Andjelu na madhia a'u toti gba e-o

¹³ Pipita-a, andjelu na madhia a'u toti gba e-o. Ma adje eli ayie ne li odje misa natsulu bandele pi Ebhe-e badha hana. Misa ango-o adu kala Ebhe, u amene li olo. ¹⁴ Eli ma adje e apa pi andjelu na madhia inde adu ne toti sakpa e me: «Bhulu oandjelu badha inde u agbigbite o ne ekpá dengo ngade 'ngu na Efalate-o.» ¹⁵ U atsia abhulu oandjelu badha-o. Li nedhinga bhomu-o, bhú ekpá bhomu, bhú epe bhomu di ne kalanga bhomu-o, oandjelu bhomu-o adu nani bedhe ngú nabhili té okpála na doto. A akúnda napa me, i bhaka okpála bata-a, u bhéle bini bhú ká uo.

¹⁶ U atsia apa di alo na osudha inde adu agu 'gú me u nde ne punda-a muma. A adu osudha koto ne koto. ¹⁷ Lele li opunda di ne osudha inde adu pi uo akoto li ma lie bhú 'he maka loto-o adu me: u adyidyí ombulu bongo na kalase me a nde andjundju maka djua, bibili maka kokpá, a adu di ndjendje maka 'kpá bhugu. 'Ndji opunda ango-o adu maka ondji kingbi. Adu naze bhú 'bhø uo ne djua, ne ngúwa di ne baluti. ¹⁸ Té okpála na doto atsia amu ka olikabhu bata inde adu aze bhú 'bhø opunda bhomu-o. A akúnda napa me okpála adu amu ka djua, ne ngúwa di ne baluti. I bhaka okpála bata-a, akúnda napa me a bhéle kpála bini bhú ká uo. ¹⁹ Padhá de, anga angu opunda bhomu-o bhú 'bhø o di ne bhú 'so o, anga 'so uo mana kpulu. A tété ne 'ndji 'ndji inde u ngamene okpála ne e sisiti-o.

20 Dú okpála bhe atigala-a, inde i mu ka olikabhu bata bhomɔ-o de-e, u dji bua o li nadhөгө oehe inde u amene e ne 'kpa o-o de. U 'o nadhөгө osisiti bua de, ne okulu 'he na olo ne aladja di ne bhe na kalase na kpéke mase, ne obhe na teme, i dɔ di-e obhe na ndula-a de. Okulu 'he ango-o u 'kpí de, u dje 'kpí de, u dhukɔ di-i de. 21 Okpála ango-o dji bua o li nabhili okpála de. U dji di bua o li kobha gba o-o de. U dji di bua o li namene zabhe gba o-o de. U dji di bua o li ezi gba o-o de.

10

Andjelu inde adɔ sakpa e ne mboye 'kpá balɔa-
o

1 Pipita-a, ma au andjelu koko bini na angu ayie abhúlá. Bongo gba ani-e adɔ maka ndindi, atsia abuku ani má bhelele! Makilima aga 'ndji ani ngbalina, bhúla ani adɔ maka ela. 'Dhɔ ani adɔ maka dingidhi djua. 2 A adɔ sakpa ani ne mboye 'kpá balɔa inde u abhulu e mabhulu. Ani a'o 'dhɔ e na kokpa-a pí 'ngbé 'ngu, ani atsia a'o bhe na gali-e pí doto. 3 Ani asula kpekpeke maka kingbi inde ngangulumba. Ani asula lie, mɔgbálá mananika atsia asula. 4 Ma di me ye engú inde li omɔgbálá mananika bhomɔ-o apa e bhú nasula ka o-o. Engú bini, ma adje eli bini ayie abhúlá, atsia apa mɔma me: «Wo engú inde li omɔgbálá mananika bhomɔ-o apa e mawo. Mo oyé-e de.»

5 Abhomɔ-o, andjelu inde ma de au e me ani nde a'o 'dhɔ e bini pí 'ngbé 'ngu, koko pí doto-o

a'e 'kpa e na kokpa-a ne bhúlá. ⁶ Anì atsia atụ silika ne 'lì Ebhe inde bhú mukobho dūduma ne dūduma-o, Ebhe inde abho kokpí di ne ndụ 'he hana inde bhúbhú-o, abho doto di ne ndụ 'he hana inde bhúbhú-o, inde abho 'ngbé 'ngu di ne ndụ 'he hana inde bhúbhú-o. Andjelu angoo apa me: «Nedhinga matá-a ade! ⁷ Engú bini, nedhinga lị andjelu na mananika-a ahólo na'u toti gba e lie, abhomụ-o Ebhe tsía méne engú inde anì awo nani e ko. Anì améne maka anì apa nani pì obalise gba e opolofeta lie ko.»

⁸ Abhomụ-o eli ma de adje iginì e ayie abhúlá-a apa matá mụma me: «Nụ ha mboye 'kpá balua inde abhulu lie mabhulu-o sakpa andjelu alụ me anì nde a'o 'dhụ e bini pí 'ngbé 'ngu, ne koko pí doto ko.» ⁹ Ma atuto lima de andjelu-o. Ma atsia ayo ka anì me anì ha mboye 'kpá balua-a mụma. Anì agie mụma me: «Haha, amba mụ zụ. A adú bhú 'bhø mụ kpikpili maka 'mụ eú, la mo obhí lie, a adú bhú 'ndja mụ sụsụ.» ¹⁰ Ma aha mboye 'kpá balua sakpa andjelu-o, ma atsia azụ. A adụ bhú 'bhø ma kpikpili maka 'mụ eú. Engú bini, ma azụ lie, a adụ bhú 'ndja ma sụsụ. ¹¹ Abhomụ-o, u atsia apa mụma me: «A ayo matá me mụ kpokpo 'ngú lị Ebhe apa me nì améne e pì bhiti okpála na ndụ bìlì hana-o, engú anì apa me nì améne e pì bhiti okongú, di ne pì bhiti ongbengbe ongámási-o.»

11

Ebhe atima opolofeta bhisi

¹ Pìpìta-a, u aha mbamba m̄ma bini. A adu maka ndula u apipima 'he ne e-o. U atsia apa m̄ma me: «N̄ p̄ma 'ngbé 'ti Ebhe di ne misa natsulu en̄ p̄ Ebhe-o. M̄ tsia ko di alo gba okpála inde ngadhögö Ebhe bhú 'ngbé 'ti gba an̄-o. ² Engú bini, 'o mbadhasu na 'ngbé 'ti Ebhe-e li ngongo. Mo op̄ma de, anga Ebhe ap̄ nani bhobhom̄-o p̄ okpála inde ne omaYuda ade-o. U adédele ḡdhu na bubu gba Ebhe-e ngubula epe ndjikpa badha ne ká bhisi. ³ Ma at̄ma obhul̄ nakpo 'ngú gba ma bhisi-e me u nde adyi bongo na talia. Ma at̄ma uo ngú nakpokpo engú gba Ebhe. U akpókpo 'ngú angoo ngubula ekp̄ ketö bini, kámá bhisi ne ndjikpa madhia.»

⁴ Obhul̄ nakpokpo 'ngú bhisi bhom̄-o, a ko ondula na olive bhisi di ne otala bhisi inde ngalu kala Ngámá na doto-o. ⁵ Li kpála le namene uo sisiti-e, djua kóto bhú 'bhö uo, i tsia bhili obhul̄ yala gba uo-o. A bhom̄-o lele maka u abhéle bhul̄ yala gba o lie-o. ⁶ A bhú uo ne angu nagbite kokp̄ ngubula me ebha adh̄-i de, nakolo li 'kp̄ inde u andjia nakpokpo engú gba Ebhe-e lie-o. A di bhú uo ne angu nadji engu me akolo ngute. A bhú uo ne angu natu pedje p̄ doto me ndu olikabhu ngangá mene doto li ndu nedhinga hana inde u akunda lie.

⁷ Nedhinga u andjia nakpokpo 'ngú li Ebhe at̄ma uo ne e lie, en̄ inde adu bhú tsu 'dú-o há 'gú ne uo. An̄ há angu uo, an̄ tsia bhili uo. ⁸ Kuo uo atigala li 'ngbé 'hi kpadji na 'ngbé ḡdhu inde u agi nani Ngámá gba uo lie li kulusi-

o. U agisila li gũdhũ ango-o 'ili. U agisila lili me Sodomo, i dũ di-e Edjipeto. ⁹ U zĩba de me okpála zi kuo uo-o de. Okpála na ndũ bili hana, ne ndũ opiga hana, ne ndũ okongú hana adú ago natsia okuo uo ngú okpí bata ne ndundu. ¹⁰ Okpála na doto akpí djali li nakpi ka uo-o. U améne anokomia na djali, u tsia dũ apũ 'he sũnda o. U améne mo-o anga opolofeta bhisi bhomũ-o amene uo kpékpéke naali.

¹¹ Engú bini, pita ekpí bata ne ndundu bhomũ-o, ewo bini na mukobho ayie agba Ebhe ali bhú uo, u atsia ayie bhúlá. Abhomũ-o, 'ngbé tsulũ na ngbéngbé ati pí okpála bhende adũ natsia uo-o. ¹² Opolofeta bhisi bhomũ-o atsia adje eli na kpékpéke inde ayie abhúlá. Eli ango-o apa pi uo me: «Yi 'u ei!» U atsia a'u'u abhúlá bhú ndindi me obhulũ yala gba uo nde ngatsia uo. ¹³ Bha bhú nedhinga bhomũ-o, kpéke adjigidjo adyiki bili, té gũdhũ-o atuko. I dũ me u nde agbo bhũsũ gũdhũ-o ne ndundundu ndjikpa-a, akũnda napa me adjigidjo bhomũ-o adyiki bini bhú káká. Abhomũ-o, okpála ketø mananika amu ka adjigidjo ango-o. Obhe atigala-a, tsulũ abedhe uo bedhe. U atsia adhøgø Ebhe inde abhúlá-o.

¹⁴ Likabhu bhe na bhisi-e akodho 'kpí akodho. 'E-e! Bhe na bata agó mbia inde?

Andjelu na mananika-a a'u toti gba e-o

¹⁵ Abhomũ-o, andjelu na mananika-a a'u toti gba e-o. Oandjelu atsia asũla abhúlá kpekpeke me:

«Naũ na doto ibili sakpa ngámá gba ya,

ne Masiya gba e-o.

Ngámá gba ya-a aú duduuma ne duduuma!»

¹⁶ Obhelesi okpála ndjikpa bhisi ne ká badha inde adulu pí odabili na ngámá gba o kala Ebhe-e atutu bhúla o ne kuto. U atsia adhögø Ebhe,
¹⁷ u apa me:

«Ebhe Ngámá Apí 'Kpí, ngamú kpála inde uu,
inde adu di nani uu,

ya ngatoko mu,

anga mo opana angu gba mu,

ndu 'ngú hana agie lie sakpa mu.

Mo otsia au ngámá pépé.

¹⁸ Opiga na doto azi nani mbutu li mu naali,

la mbia inde-e,

ke 'ngú gba mu-o ago pí uo ago.

Nedhinga nakodho 'ngú gba okpála inde amu-o akolo.

A ko nedhinga inde mo ogie bádha 'ngú lie pí obalise gba mu opolofeta

di ne ndu okpála gba mu-o hana,

inde di ngamanga mu,

ongbengbengbe ne odjedjedje-o.

A ko nedhinga ngú nabhili obhe ngabhøle doto-o.»

¹⁹ Abhomu-o, 'ngbé 'ti Ebhe inde abhúla-a abhulu lie, u atsia au sanduku na gandja-o.* Ekpí andjengene, mugbálá asula, adjigidjo di ne itimeli na kpekpeke adhika.

* **11:19** 11:19 Sanduku na gandja: A ko sanduku inde u abu nani opapala teme inde u aye ofli ndjikpa gba Ebhe-e bhú e-o.

12

Engú na ngangamba inde abhaka ɛlɛ inde adu nazu

¹ Pipita-a, ma au engú bini na ngangamba ngamene lie abhúlá: a adu ɛlɛ bini inde adyi li kute e ela. Epe adu sa 'dhu ani. A adu bhú 'ndji ani ne ndata na ngámá inde li e ne oikupala ndjikpa ne ká bhisi. ² Ɖlɛ ango-o adu ne ebhi. Nedhinga ani adu adjeke nazu lie, ani adu natu 'ue ka nazu ka bhú 'bu e-o.

³ Engú na ngangamba koko amene matá lie abhúlá: a adu 'ngbé kpulu na ngbéngbé. Kute ani adu mbembe má ngua! A adu li ani ne ondji 'ndji mananika, di ne odidi ndjikpa. A adu pí ndu ondji ani hana ne ndata na ngámá. ⁴ Ani apo té oikupala ne 'so e, ani atsia abala uo kuto. A akunda napa me u po bhúla ndu oikupala hana-a, u tsia gbo bhusu bhusu bata-a, ani abala kuto bhomu-o bini bhú káká. Ani atsia anu alu kala ɛlɛ inde adu akunda nazu-o ngubula me, ni zu ndili li ɛlɛ bhomu-o azú e bha li nedhinga nakoto ka ani-o. ⁵ Abhomu-o, ɛlɛ-o azu ndili na bhobhoko. Ani aú pí 'ndji ndu opiga hana ne angu. Kolo me-e, u atsia a'e ndili bhomu-o anu ne ani denko Ebhe, di ne denko kiti na ngámá gba ani-o. ⁶ Ɖlɛ-o atsia akpe abhú 'gu li bili inde li Ebhe aleke nani e pi ani, ngu napa me ni ku ani ngubula ekpí kɛtɛ bini, kámá bhisi ne ndjikpa madhia-o.

⁷ Abhomu-o, gbele aka abhúlá. Mikaele ne oandjelu gba e agu 'ngbé kpulu-o. Kpulu ango-o atsia aholo di gbele bhú dabili bini ne oandjelu

gba e-o. ⁸ Engú bini, Mikaele ne oandjelu gba e agboko egú-o. Kaka-a, 'ngbé kpɔ̀ɔ-o ne oandjelu gba e sia matá bili da nadu abhúlá de. ⁹ U atsia abhike 'ngbé kpɔ̀ɔ-o kilidjo. A ko kpɔ̀ɔ na didili, inde u nga'i e me Djabulu, i du di-e Satana, bhulu napite okpála na doto libhomu-o. U abhike ani kuto bhú dabilí bini ne oandjelu gba e-o.

¹⁰ Pipita-a, ma adje kpéke eli bini ayie abhúlá. Eli ango-o adu apa me:

«Nedhinga lí Ebhe gba ní-e ngakobho okpála lie akolo!

Mbia inde-e, Ebhe gba ní-e asuno angu gba e me ni ne ngbé Ngámá-a asuno!

Mbia inde-e, angu sakpa Masiya gba ani-o.

Padhá de, anga u abhike bhulu napa 'ngú lí ondaise ní-e akilidjo,

ngaani kpála inde adu apa 'ngú lí uo pí Ebhe gba ní-e ngbikpi ne sukpe-o.

¹¹ Ondaise ní aha angu ani ka ngute gba Ndili Kandole

di ne ka nakpokpo 'li Ebhe pí okpála.

U kpe kuo de, u atsia atse 'kpa lí mukobho gba o ngubula me o mumu.

¹² Kaka-a, ne kokpí ne yi okpála inde ngadulu bhúbhú hana-a, yi du bhú djali!

A ko la mangua likabhu dho pí yi okpála inde ngadulu píla

doto ne yi obhe ngadulu bhú 'ngbé 'ngu-o, anga djabulu akè agba yi akè.

Ani abedhe ne egú bedhe, anga ani mbila hana me nedhinga atigala pí ni bedi.»

13 Li 'ngbé kpulɔ-o au lie me u abhike ni kuto abhike-e, ani aholo nabhike ɛlɛ inde azu igini ndili na bhobhoko bhomɔ-o. 14 Engú bini, u aha mbudha 'ngbé ndua pi ɛlɛ bhomɔ-o ngú napa me ani 'ulu, amba ani nɔ dɔ li bili inde u aleke e pi ani abhú 'gɔ-o. U atsia adɔ akɔ ani oo ngɔbula kalanga bata ne ndundu me 'ngbé kpulɔ-o nde to mbolo li ani de. 15 Abhomɔ-o, kpulɔ-o atsia azie engu bhelé nganda ɛlɛ-o maka ngade 'ngu, da napa me akpe ne ani. 16 Engú bini, doto ago ateteke ɛlɛ-o. Doto abhulu 'bhɛ e, atsia abhi engu li 'ngbé kpulɔ-o azie e-o. 17 Li bua kpulɔ-o ake lie ne ɛlɛ-o, ani anɔ aha 'gú ne dú ongisi gba ɛlɛ-o, obhende ngamanga Ebhe inde di ngalila kɔkɔlu 'ngú inde li Yesu ambamba ta e-o. 18 Pipita-a, 'ngbé kpulɔ-o anɔ adɔ pí sike lingo 'ngbé 'ngu.

13

'Ngbé kpulɔ-o aha angu gba e pi nɔte koko

1 Pipita-a, ma au enɔ bini ngakoto abhú 'ngbé 'ngu. 'Di ani adɔ ndjikpa, 'ndji ani adɔ mananika. Ani adyi ndata na ngámá ne ndɔ odi e hana. Ani atsia adyi di o'ili nasobho Ebhe ne pí 'ndji e hana. 2 Enɔ inde ma au e adɔ maka sia. Odɔ ani adɔ maka bhe gba onɔte, 'bhɛ ani adɔ maka 'bhɛ kingbi. 'Ngbé kpulɔ-o aha angu na ngbéngbé gba e pi enɔ-o. Enɔ-o atsia adɔ pí kiti na ngámá gba ani-o. 3 Suka ondji ani adɔ mɔgito me u abi eka bhe na mɔgwe mɔgwe, engú bini eka na mɔgwe mɔgwe ango-o atsia ambe. Engú bhomɔ-o atsia angamba okpála na doto libhomu.

Kaka-a, u atsia akpata enu bhomu-o. ⁴ Ndu okpála hana atsia aholo nadhègè 'ngbé kpulu-o, anga ani aha angu pi enu-o. Ndu okpála hana adhègè di enu-o ne napa me: «A ko da inde maka enu inde? Ati da nagu ani da?»

⁵ U aha nani kpadji pi enu bhomu-o me ani du napa oeli na 'ngbé 'ndji, amba ani du di nasobho Ebhe. U aha angu pi ani ngu namene engu bhomu-o ngu epe ndjikpa badha ne ka bhisi.

⁶ Ani aholo napa osisiti 'ngu li Ebhe, ne nasobho 'li ani di ne nasobho bili inde ani adudu li e, di ne okpála hana inde adudu abhula-o. ⁷ U aha kpadji pi ani me ani gu okpála gba Ebhe di ne naha angu uo. U aha angu pi ani pi 'ndji okpála na ndu bili hana, ne ndu opiga hana, ne ndu okongu hana.

⁸ Ndu okpála na pa doto hana inde u ye nani 'li o bhú bhuku na mukobho-o de-e, adhègè ani. Bhuku angu-o, a ko bhe gba Ndili Kandele inde u abhele e-o. U ye nani 'li uo bhúbhú de, nayie maka li Ebhe abho doto lie-o.

⁹ Yi dje ndjindji, i du me a nde li yi ne djedje nadje 'kpi ko.

¹⁰ Kpála inde ayo me ani nu bhú tikpu-o,
anu bha bhú tikpu.

Kpála inde ayo me ani kpi li mbotia-a,
akpi bha li mbotia.

Kaka-a, a ayo me okpála gba Ebhe-e du ne 'ndja
bua,
di ne nabhuka .

Enu koko akoto bhú doto

¹¹ Pipita-a, ma au enu koko ngakoto bhú doto.
Adu bhú 'ndji ani ne didi bhisi maka ndili

kandələ. Anì atsia adu agama 'ngú maka 'ngbé kpulu. ¹² A adu di bhú anì ne angu maka angu inde adu bhú enu bhende akoto bhú 'ngbé 'ngu-o. Anì adu amene 'he ne di kala enu bhe na 'ngbé 'ngu-o. Anì adu apa pí ndu okpála na doto hana me, u dhөгө enu na 'ngbé 'ngu li eka na muge muge gba e ambe-o.

¹³ Enu bhe na bhisi inde-e adu amene ongamba 'ngú na ngbengbengbe. Anì adu belegu nagbele djua nayie abhúla nakө pí doto. Anì adu amemene li djila ndu okpála hana. ¹⁴ Anì adu apipite ndu okpála na píla doto hana inde u ye nani 'li o bhú bhuku na mokobho-o de-o. Anì adu apipite uo ne ongamba 'ngú inde anì adu amene e li djila enu na 'ngbé 'ngu-o. Anì adu akata uo me u bho kulu enu inde abi nako eka na muge muge li mbotia, eka angoo atsia ambe-o.

¹⁵ Enu na bhisi-e asia angu ngú nato ewo bhú kulu enu na bini-o, ngabula me a du nagama 'ngú, amba a du nabhili ndu okpála hana inde i dhөгө ni de-o. ¹⁶ Enu angoo aye tele li ndu okpála hana. Anì aye li okpála koko li 'kpa o na kokpa, anì aye li okpála koko pidi o, abana i du mboye ndili, abana i du bhele kpála, abana i du bhulu tia, abana i du bhulu ndibhili, abana i du bali, abana i du kpála inde bhú bali ade. ¹⁷ Kpála bini ti da nakala 'he de, i du di-e natsindji 'he de, i du me tele nde li kute anì ade-o. Tele angoo, a ko 'li enu bhomu, i du di-e alo na 'li anio. ¹⁸ A inde-e nedhinga inde ayo ne imbilangu. Kpála inde ne imbilangoo tí da nambila ta alo gba enu-o, anga alo angoo viti bini ne 'li kpála-

kuti. Alo ango-o kámá madhia, ndjikpa madhia ne ká madhia.

14

Okpála inde li Ndili Kandøø-o akala o

¹ Ma atsia matá 'kpí, ma au Ndili Kandøø-o me ani nde alu pí eta na Siona . Okpála kètø kámá bini, ndjikpa badha ne ká badha inde u aye 'li Ndili Kandøø di ne 'li 'Dyi ani pidi o alulu de ani. ² Pipita-a, ma adje eli ayie abhúlá. Eli ango-o adu mugo me a ko gili wowo 'ngu, maka gili mugbalá na kpekpeke. Eli inde ma adje e adu maka gili dumu, nedhinga li obhubhulu-o abhibhi lie-o. ³ Bhiti okpála bhomu-o adu ali etsi na mbia kala kiti na ngámá, di ne kala okpála badha na ngangamba ne obhelesi okpála-o . Kpála bini ti da nale etsi ango-o de, bha bini okpála kètø kámá bini, ndjikpa badha ne ká badha li Ndili Kandøø-o akala o píla doto-o. ⁴ Ngau-o, u siti lio ne olisi de. U alila lio bubu kala Ebhe. U ngakpata Ndili Kandøø-o ne ndu bili hana ani nganu li e-o. Ani akala nani uo bhú ká okpála-kuti ngubula napu uo pi Ebhe di ne pi e bhubhulu maka gina ngua. ⁵ Eu koto nani bhú 'bhe uo belegu de bini. Engú na sisiti napapa li uo ade.

Oandjelu bata akpokpo 'ngú pindji lele maka li Ebhe akódho 'ngú lie-o

⁶ Pipita-a, ma au andjelu koko. Ani adu akodho 'kpí abhúlá tsutsu naali maka edhu. Adu ka ani ne Bádha Ngali na duduma inde ani adu akpokpo e pi okpála na píla doto, okpála na ndu bili hana,

ne ndu opiga hana, ne ndu okongú hana. ⁷ Ani adu nasusula kpekpeke me: «Yi kpe Ebhe, amba yi dhөгө di ani! Padhá de, anga nedhinga me ani kodho 'ngú gba okpála na doto akolo. Yi dhөгө kpála inde abho kokpí ne doto ne 'ngbé 'ngu di ne okpongu-o.»

⁸ Pipita-a, andjelu na bhisi-e akpata bhe na kalanu-o. Ani adu apa me: «Babilona na ngbéngbé-e ati! A ati na paká paká! Ani ase ndu opiga hana ne siti vino gba e-o. Vino ango-o, a ko zabhe inde ani ngamene e-o!»

⁹ Pipita-a, andjelu na bata akpata obhe bhisi bhomu-o. Ani adu asusula me: «Li kpála dhөгө enu-o, ne kulu ani-e, li u aye di tele gba enu-o pidi e, i du di-e li 'kpa e, ¹⁰ kpála ango-o ndji bhadi vino na ke 'ngú gba Ebhe-o! Ebhe atúko ngili vino ango-o bhú kópo na ke 'ngú gba e-o! Ngua kpála bhomu-o asía likabhu bhú djua na baluti kala oandjelu na bububu di ne kala Ndili Kandөлө-o. ¹¹ Ngúwa na djua inde ngato mbolo li uo-o nga'u abhúlá ndu 'kpí hana. Ndu okpála hana inde ngadhөгө enu, inde di ngadhөгө kulu ani, inde u aye tele gba ani-e li o-o, ngazu likabhu ngbikpi ne sukpe. U guguo de.» ¹² Kaka-a, a ayo me okpála gba Ebhe inde ngakpata líli gba ani-e, inde di ngalila nabhuka gba o bhú Yesu-o du ne 'ndjá bua.

¹³ Pipita-a, ma adje eli bini ayie abhúlá, a atsia apa muma me: «Ye me: <A ko djali pi okpála inde amu nayie pi mbia inde-e me u nde abhuka Ngámá-o!> Bu Bhobua apa me: <A na paká, u guo

ka bhiti kulu u amene e guguo. Padhá de, anga kulu gba uo-o ngakpata uo.»»

Nedhinga na'e nguwa na p̄la doto

¹⁴ Pip̄ita-a, ma atsia matá 'kp̄í, ma au ndindi bini na bubu. A adu pí ndindi ango-o ne ehe maka kp̄ála. A adu pí 'ndji ani ne ndata na ngámá inde u abho e lí olo. A adu sakpa ani ne dhádha bini na dhedhe.† ¹⁵ Abhomu-o, andjelu koko bini akoto bhú 'ngbé 't̄i Ebhe inde abhúlá-o. Ani atsia asula pi kp̄ála inde adu pí ndindi-e me: «Ha dhádha gba mu-o, amba mu holo na'e nguwa abhiye. Padhá de, anga nedhinga na'e'e-e akolo. Nguwa na p̄la doto abhele ngú nakoko abhele!» ¹⁶ Abhomu-o, kp̄ála inde adu pí ndindi-e apu ne dhádha gba e p̄la doto. Nguwa na p̄la doto atsia a'e lie.

¹⁷ Pip̄ita-a, andjelu koko akoto bhú 'ngbé 't̄i Ebhe inde abhúlá-o. A adu di ka ani ne dhádha na dhédhé.

¹⁸ Pip̄ita-a, andjelu koko akoto li bili natsulu enu pi Ebhe-o. A adu bhú ani ne angu pí djua. Ani asula pi bhe adu ne dhé dhádha sakpa e me: «Ha dhé dhádha gba mu-o, amba mu ko vino inde p̄la doto-o nedi. Líí-e ambe.» ¹⁹ Andjelu-o atsia apu ne dhádha gba e p̄la doto. Ani atsia ako vino na p̄la doto-o. Ani atsia abu bhú 'ngbé ngbengələ na ke 'ngú gba Ebhe-o. ²⁰ U agbe ngbengələ-o bhú gudhu-o kilidjo, u atsia api lí vino-o. Abhomu-o, ngute atsia aze bhú ngbengələ-o. Ngute ango-o anu a'u nakolo

† 14:14 14:14 Tsia bhú Dan. 7:13.

li 'bhø opunda. A atsia ayangba masikpe de kilometele kámá bata.

15

Oandjelu mananika ago ne olikabhu mananika

¹ Pipíta-a, ma atsia 'kpí, ma au matá engú na ngangamba koko akoto abhúlá. A adu engú na ngbéngbé inde di na tsulú tsulú. Ma au oandjelu mananika, a adu sakpa uo ne gba olikabhu mananika. Pipíta-a, likabhu koko matá ade, anga a ngasuno ke 'ngú inde li Ebhe apana e li soso-o ngae.

² Pipíta-a, ma au ehe bini maka 'ngbé 'ngu i mana bitolobi, a atsia amata lie ne djua. Ndu okpála hana inde aha nani angu enu-o, inde aha di angu kulu ani bhú dabili bini ne alo inde ngasuno 'li ani-e, alulú pí 'ngbé 'ngu ango-o. A adu sakpa uo ne odumu li Ebhe aha e pi uo-o.

³ U adu ali etsi gba Moidje , bali gba Ebhe-o, di ne etsi gba Ndili Kandøø-o . Etsi ango-o adu me:
«Ebhe Ngámá Apí 'Kpí,

okulu gba mu-o ngbengbenge.

A di na ngangamba.

'Ngbé Ngámá gba okpála,
okpadji gba mu-o ne okukulu kpadji,
a la di ngbingbili.

⁴ A mánga mu de da, Ngámá?

A adhégo mu de da?

Padhá de, anga mu bubu ngamu kpi mu kpi.

Ndu opiga hana agó atutu lipuku o kala mu.
Padhá de, anga mo opana ngbili 'ngú gba mu-o pi uo apana.»

⁵ Pipita-a, ma atsia 'kpí, ma au 'ngbé 'ti Ebhe inde abhúlá-a abhulu lie. A adu bhúbhú ne 'ti ngbangbali li Ebhe adu asuno lie bhú e-o. ⁶ Abhomu-o, oandjelu mananika inde adu ne gba olikabhu mananika sakpa o-o akoto bhú 'ngbé 'ti Ebhe-o. U adyidyí obongo inde na kpéke mase,* inde avuvu má tuu tuu! U agbigbite di mbulu o ne mukabha na olo. ⁷ Suka okpála badha na ngangamba-a aha kópo na olo mananika pi oandjelu mananika-o. Okópo ango-o adu bedhe bedhe ne oke 'ngú gba Ebhe inde bhú mukobho duduma ne duduma-o. ⁸ Abhomu-o, 'ngbé 'ti Ebhe-e abedhe ne ngúwa bedhe ka zi Ebhe di ne angu gba ani-o. Kaka-a, kpála bini ti da nali bhú 'ngbé 'ti Ebhe-e de, nakolo li nedhinga li olikabhu mananika li oandjelu-o adu ne e amene lie lie-o.

16

Okópo na ke 'ngú gba Ebhe

¹ Pipita-a, ma adje kpéke eli ayie ne bhú 'ngbé 'ti Ebhe . Eli ango-o apa pi oandjelu mananika-a me: «Yi nunu, amba yi tuko okópo na ke 'ngú mananika gba Ebhe-e píla doto!»

² Andjelu na bini-e anu, ani atsia atuko ke 'ngú inde adu bhú kópo gba e píla doto. Abhomu-o, oeka na sisiti, inde di nake make atsia aze li kute ndu okpála hana inde adu ne tele gba enu-o, inde adu di natoko kulu ani-o.

* **15:6** 15:6 Bongo na kpéke mase: U abho nani bongo ango-o li lene.

³ Andjelu na bhisi-e atuko ke 'ngú inde adu bhú kópo gba e pí 'ngbé 'ngu. 'Ngbé 'ngu-o akolo maka ngute kpála inde akpi. Abhomu-o, ndu ohe hana inde adu bhú 'ngbé 'ngu-o me a nde u-o atsia amu.

⁴ Andjelu na bata-a atuko ke 'ngú inde adu bhú kópo gba e bhú ongade 'ngu, ne bhú okpongu. A atsia adji lie ngute. ⁵ Ma atsia adje andjelu inde adu ne angu pí ongu-o ngapa me:

«Ngamu kpála na bubu, inde u, inde adu di nani u-o, mu ne ngbili kpála ,
anga mo opana ngbili 'ngú gba mu-o.

⁶ Padhá de, anga okpála abhili okpála gba mu-o di ne opolofeta .

Mo oha bhadi pí uo ngute me u ndji.

U asia engú inde ati ne uo-o!»

⁷ Pipita-a, ma adje eli akoto pí misa natsulu mangotsi pí Ebhe-o. Eli angu-o adu apa me:

«A ko paká, Ebhe Ngámá Apí 'Kpí,
ndu 'ngú mo okodho e hana-a,
mo okodho li lelele,
a la bhadi ngbingbili.»

⁸ Andjelu na badha-a atuko ke 'ngú inde adu bhú kópo gba e píla ela. Ani atsia aha kpadji pí ela me a atsulu okpála ne djua gba e-o.

⁹ Abhomu-o, bili akpa na mugwe mugwe, okpála atsia atsulu kaka. U asobho 'li Ebhe inde adu bhú e ne angu ngú natima ngua oke 'ngú bhomu-o. Engú bini, u dji bua o ngú nadhogè Ebhe de.

¹⁰ Andjelu na bhuluvue atuko ke 'ngú inde adu bhú kópo gba e pí kiti na ngámá li enu-o adu nadu pí e-o. Abhomu-o, biti agba kuti-ngámá gba

enu-o. Okpála atsia adu nazu 'mi o ka likabhu. ¹¹ U adu asobho 'li Ebhe abhúlá ka olikabhu gba o di ne ka oeka inde adu li uo-o. Engú bini, u dji bua o li osisiti 'ngú inde u adu namene e de.

¹² Andjelu na madhia-a atuko ke 'ngú inde adu bhú kópo gba e pí ngade 'ngu na Efalata. Engu-o atsia a'ulu hana ngú naka kpadji pi ongámási inde ngayie ne ndjongu-o. ¹³ Abhomu-o, ma au osisiti bua bata ngakoto bhú 'bhé 'ngbé kpulu-o ne bhú 'bhé enu-o, di ne bhú 'bhé polofeta na eu-o. Osisiti bua ango-o adu maka omabianga. ¹⁴ A ko osisiti bua inde li djabulu atima o-o. U adu amene ongamba 'ngú . U adu nanu agba ongbengbe ongámási na doto libhomu ngú napo bhúla uo ngubula gbele na 'ngbé 'kpí gba Ebhe Apí 'Kpí-o.

¹⁵ Ngámá Yesu apa me: «Tsitsia! Ma ngago maka bhulu 'zi! A ko djali pi kpála inde li zuku, inde ngalila obongo gba e li kute e ngú napa me ni aná ndumbu de, me ni asía namu de ka nakoto bhú djila okpála ndumbu-o.»

¹⁶ Osisiti bua apo bhúla ongbengbe ongámási li bili inde u a'i e bhú eli gba omaYuda me Alamagedo.

¹⁷ Andjelu na mananika-a atuko ke 'ngú inde adu bhú kópo gba e atu 'kpí. Kpéke eli bini atsia akoto abhú 'ngbé 'ti Ebhe. A ayie li pápá na kiti na ngámá-o. A apa me: «A amene lie amene!» ¹⁸ Abhomu-o, ekpi andjengene, mugbálá asula, adjigidjo na kpekpeke adhika. Ngu 'ngú bhomu-o mene nga nani lie kalanu

de, nayie maka li Ebhe abho kpála píla doto lie-o! ¹⁹ 'Ngbé gũdhũ na Babilona agũgũmũ bhũsũ e ne ndundundu bata. Abhomũ-o, ndũ ogũdhũ na okũti hana atuko kuto. Abhomũ-o, Ebhe atsia a'o nga la 'to e 'to 'ngbé gũdhũ na Babilona. Anĩ atsia aha pĩ anĩ kópo na vino na ke 'ngú gba e na sisiti inde adũ adũla bhú e madũla me anĩ ndji. ²⁰ Ndũ okpeme hana atsia angita, ndũ oeta hana atsia angita di. ²¹ Ongbengbe itimeli na titili masikpe de kilo ndjikpa badha atsia abala pĩ okpála. Abhomũ-o, okpála atsia asobho Ebhe ka likabhu na itimeli-o. Padhá de, anga likabhu ango-o adũ kpekpeke na kuo kuo.

17

Nakodho 'ngú gba okpála na Babilona

¹ Abhomũ-o, sũka oandjelu mananika inde i de ne okópo na ke 'ngũ-o sakpa o ago apa mũma me: «Gogo, ma asúno pĩ mũ lele maka li Ebhe akodho 'ngú gba 'ngbé bhũlũ zabhe-e lie-o. A ko 'ngbé gũdhũ inde u ayiki e lingo ongbengbe ongade 'ngu bhelé. ² Ongbengbe ongámási na doto amene zabhe ne anĩ. Okpála na doto atsia alangba ne vino gba anĩ na zabhe-o.»

³ Abhomũ-o, Bu Bhobua abedhe ma, Andjelu-o atsia anũ ne ma abhú mili bilĩ. Ma au ẽlẽ bini inde adũ pĩ enũ na mbembe má ngua! Enũ ango-o abuku kũte e libhomu ne o'ili inde ngasobho Ebhe, 'ndji 'ndji adũ li anĩ mananika di ne didi ndjikpa. ⁴ Ɛlẽ ango-o adyi obongo na mbembembe na tia naali. Anĩ atsia adyi omagege na olo ne obhe na teme na mase naali di

ne omayaka li kute e bedhe. A adu sakpa ani ne kópo na olo inde abedhe ne zibotu bhú e bedhe ka zabhe gba ani-o. ⁵ U aye pidi ani 'ili bini inde li ta e awo lie mawo. 'Hi ango-o me: «BABILONA NA NGBÉNGBÉ, 'hi OBHULU ZABHE DI NE OSISITI 'ngú NA DOTO-O.» ⁶ Ma au me òlò ango-o alangba ne ngute okpála gba Ebhe-o, ngute obhe u abhili o ka u abhuka Yesu lie-o. Ma au ani lie, ma angamba naali.

⁷ Abhomu-o, andjelu-o apa muma me: «Mu ngangamba ka ni? Ngama-a, ma ambamba ta 'ngú gba òlò bhomu-o ne enu inde abi ani-e pi mu, enu inde li e ne 'ndji 'ndji mananika di ne odidi ndjikpa-o. ⁸ Enu inde mo ou e bhomu-o, adu nani tété. La-a, ani matá ade. Ani akoto bhú tsu 'dú-o, ani tsia nú bhú ngita gba e-o. Okpála na doto inde u ye nani 'li o bhú bhuku na makobho-o de nayie maka nani li Ebhe abho doto lie, angamba li nau enu-o. Padhá de, anga ani adu nani tété, la-a ani matá ade. Engú bini, ani akoto matá ne toto.

⁹ A ayo mbia inde-e nadu ne imbilangu di ne bua nakpokpo kú 'ngú. Ondji 'ndji mananika-a, a ko oeta mananika inde li òlò-o ngadu pí e-o. A ko di ongbengbe ongámási mananika-o. ¹⁰ Obhe bhuluvue bhú ká uo-o, kulu gba uo-o andjia, bhe na madhia ngabha bhú kulu, bhe na mananika-a go nga de. Ani agó lie, ani améne bha nedhinga masudha. ¹¹ Enu inde adu nako tété-e, inde matá tété ade bhomu-o, ngaani makpe-e, a ko 'ngbé ngámá na madjina. Ani bhú ká ongbengbe ongámási mananika-o. Ani adjí bhú ngita gba e-o.

¹² Odidi ndjikpa inde mo ou e bhomu-o, a ko ongbengbe ongámási ndjikpa inde i 'u nga pí kiti na ngámá de-o. Engú bini, u asía angu ngú nau bhú dabili bini ne enu-o ngú saa bini. ¹³ Ndu ongámási ndjikpa bhomu-o hana bha ne koli mabhundja bini. U ne gumu naha angu di ne ngámá gba o ngú namene kulu lio pí enu-o. ¹⁴ U agú gbele ne Ndili Kandølo-o , la-a, Ndili Kandølo-o ahá angu uo. Padhá de, anga a ko Ngámá gba ongámási, a ko 'Ngbé Ngámá gba ongbengbe ongámási. Omaha Ndili Kandølo inde ani a'i o-o, ani atsia alo o-o, u ahá bhadi angu uo bhú dabili bini ne ani. U ngakpata Ndili Kandølo-o ne bua o bini.»

¹⁵ Pipita-a, andjelu-o apa matá muma me: «Oengu inde mo ou e li bili inde li ølo na zabhe alu li e bhomu-o, a ko okpála na ndu bili hana, a ko bhiti okpála, a ko opiga di ne okongú. ¹⁶ Odi 'nu ndjikpa ne enu inde mo ou e bhomu-o, ayála ølo na zabhe-o. U bhá 'he li ani hana, u a'ó ká ani ndumbu, u azú mbilika ani, u tsia bú dú ani bhú djua. ¹⁷ Padhá de, anga Ebhe a'o li bua uo me u mene mukunda gba ani-o. U améne ne bua bini me o ha angu na ngámá gba o me o mene kulu lio nedi pí enu-o, nakolo li nedhinga li 'li Ebhe améne lie lie-o. ¹⁸ La di-e, ølo inde mo ou e-e, a ko 'ngbé gudhu inde ngau pí ongámási na doto-o.»

18

Nati ka gudhu na Babilona

¹ Pipita-a, ma au andjelu koko ayie abhúlá ngakò kuto. A adu bhú anì ne angu na ngbéngbé. Abhomu-o zì anì abha doto libhomu. ² Anì asula kpekpeke me:

«'Ngbé Babilona ati-e ngae! 'Ngbé Babilona ati-e ngae!

A akolo ibili bìli li odjabulu ngadulu li e, bìli inde li ndu osisiti bua hana ngadulu li e.

A bhomu-o bìli li odhu ne onu inde kala Ebhe sisiti-e ngadulu li e-o.

³ Padhá de, anga ndu okpála na doto hana andji siti zabhe gba anì-e maka okpála andjindji vino lie-o.

Ongbengbe ongámási na doto amene zabhe ne anì, obhulu natsindji 'he na pía doto atsia akpo di li angu na bhiti tia gba anì-o.»

⁴ Pipita-a, ma adje eli koko ayie abhúlá. A adu apa me:

«Ngayi okpála gba ma-a, yi ze bhú Babilona zeze, amba yi améne siti 'ngú bhú dabili bini ne anì de,

ngú napa me yi asía olikabhu inde abháka anì-e bhú dabili bini ne anì de.

⁵ Padhá de, anga osisiti 'ngú gba anì-e apo 'ta e akolo makolo abhúlá.

Ebhe atsia abhundja osisiti 'ngú gba anì-o.

⁶ Yi mene anì maka anì amene okpála koko lie-o.

Yi gie siti 'ngú anì amene e pì anì bhutsibhutsi bhisi.

Yi ha pandi inde ane bhe gba anì-e ne kpéke bhutsibhutsi bhisi-e pì anì

bhú kópo inde ani adu a'o pandi gba e bhú
'bhe okpála ne e ko.

⁷ Ani adu akpi ndjili naali bhú asasaua na tia gba
e-o.

Kaka-a, yi gie di likabhu ne małopolu pi ani
li lelele.

Padhá de, anga ani ngapa li bua e me:

«Ma adu pi kiti na ełe gba ngámá, ma ne eke
ade,

ma adú galikpe bhú talia de.»

⁸ Kaka-a, ndu okpekpeke da 'ngú inde a'o lie pi
ani-e agó galikpe atí pi ani
li koli 'kpí bini ndundu hana.

Okpekpeke da 'ngú angu-o ngae inde: nakpi ka
okpála, talia di ne gumu,

li djua tsia tsulu di ani hana má kpekobhe!

Padhá de, anga Ngámá Ebhe inde akodho 'ngú
gba ani-e, ne kpála na angu.»

⁹ Abhomu-o, ongbengbe ongámási na doto
inde-e amene zabhe bhú dabili bini ne ani. U
akpi ndjili ne ani li bhiti tia gba ani-o. Li u aú
ngúwa djua atsulu ani-e lie, u kú 'gbá, u tsia
lopolu di lio ngú ani. ¹⁰ U alulu de ani tsutsu
ka nakpe likabhu inde abhaka ani-o. U tsia pá
me:

«A ko likabhu na ngbéngbé pi mu, Babilona!

Mu ne 'ngbé gudhu, mu la di ne angu.

La-a, Ebhe akodho 'ngú gba mu-o bha bhú saa
bini padhá!»

¹¹ Obhulu natsindji 'he di ngaku 'gbá, uo di
bhú talia li 'ngú gba ani-o. Padhá de, anga kpála
bini ngakala matá ehe gba uo-o ade. ¹² Abana
i du di-e olo, ne oaladja, ne oteme na mase ne

omayaka, kpála bini ngakakala ade. Abana i dɔ obongo na kpéke mase, ne ombembe obongo na zizi, ne obongo inde u abho e li dele gba okokó, kpála bini ngakakala ade. Abana i dɔ ndɔ djua ondula na babadha sese hana, abana i dɔ ndɔ djua oehe inde u abho e li 'te 'ya hana di ne obhe u abho e li ondula na mase hana, ne obhe u abho e li teme, kpála bini ngakakala ade. Abana i dɔ di-e ndɔ djua kalase hana, kpála bini ngakakala ade. ¹³ Abana i dɔ oehe ne okpálá koko inde u aleleke se bili abhú 'ti ne e, ne mila di ne omungotsi koko, ne bandele, kpála bini ngakakala ade. Abana i dɔ pandi, ne emɔ, ne fufú, kpála bini ngakakala ade. Abana i dɔ obagala, ne okandøø, ne opunda, ne okpulukpulu, kpála bini ngakakala ade. Abana i dɔ 'lá kpála-kuti, kpála bini ngakakala sɔsuka ade.

¹⁴ Obhulɔ natsindji 'he bhomɔ-o apa pi gudhɔ bhomɔ-o me:

«Ndɔ oehe inde mo okukunda e hana andjia gba mɔ andjia!

Ndɔ otia gba mɔ di ne obabadha 'he gba mɔ-
o
andjia ka mɔ andjia,

u ú matá gba mɔ belegu de bini!»

¹⁵ Obhulɔ natsindji 'he inde akpo li tia na gudhɔ ango-o alúlɔ de ani tsutsu ka nakpe likabhu inde abhaka ani-o. U adú aku 'gba, u tsia lópolo di lio ngú ani. ¹⁶ U adú apa me:

«A ko likabhu na ngbéngbé pi yi,
okpála na 'ngbé gudhɔ-o!

Yi adyi li kute yi babadha bongo inde na
kpéke mase.

Yi atsia adyi di li yi obongo na mase naali inde
na mbembe má ngua,
inde li e ne zizi.

Yi adyi di omagege na olo bhú dabili bini ne
oteme na kpéke mase di ne omayaka.

¹⁷ Ndu 'he bhomu-o hana angíta bha li saa bini
má kpikili!»

Abhomu-o, ndu obhulu nadjele zabu hana,
bhú dabili bini ne okpála inde u abi o, okpála
nadhuku pí 'ngbé 'ngu bhú dabili bini ne obhulu
nagili tia pí 'ngbé 'ngu-o alulu mbo tsutsu. ¹⁸ U
atsia adu asusula ka nau ngúwa adu aze ka natsi
ka gudhu-o me: «A akpo 'ndji e li 'ngbé gudhu
inde-e ne bhedho?» ¹⁹ U adu aba embi bhú 'ndji
o, u adu aku 'gbá, u atsia adu alopola lio me:
«A ko likabhu na ngbéngbé pi yi, okpála na 'ngbé
gudhu-o!

Bhiti tia gba yi-e ngae inde li okpála inde
ngamene kulu pí 'ngbé 'ngu-o

akpo ka e ko.

La-a, ndu 'he bhomu-o hana andjia bha li
saa bini má kpikili!»

²⁰ Ngayi okpála inde abhúlá-a, yi kpi ndjili li
nakpi ka gudhu ango-o!

Ngayi omaha Ebhe, ne yi obhulu titima gba
Ebhe, di ne yi opolofeta , yi kpi ndjili!

Padhá de, anga Ebhe akodho 'ngú gba ani-e ka
siti 'ngú inde ani amene e li yi ko!

²¹ Abhomu-o, andjelu bini na angu aha teme
bini maka 'ngbé teme nadyi ngano, ani atsia
atamba bhú 'ngbé 'ngu ne napa me:

«U atúmba bhadi ngbé gúdhù na Babilona ne
kpéke me,
kpála bini ú matá galikpe aní de.

²² Obhùlù nabhi dùmù bhí matá galikpe agba m̀ de.

Obhùlù na' u toti 'ú matá galikpe agba m̀ de.
Obhùlù nali ' tsi lí matá galikpe agba m̀ de.

Obhùlù ikalana dú matá di agba m̀ de.

Okpála dyí di matá ngano agba m̀ de.

²³ Zi tala dú matá di agba m̀ de.

U djé matá di 'li okpála inde aha lio agba m̀ de.

Padhá de, anga obhùlù natsindji 'he inde adù
bhú gúdhù gba yi-e,
adù ongbengbe kpála na doto.

Obhùlù kobha gba yi-e apite ndù okpála hana.

²⁴ Okpála na Babilona abhili opolofeta,
ne okpála gba Ebhe di ne ndù okpála hana
inde u abhili o p̀la doto-o.»

19

Etsi ngú nadhøø Ebhe

¹ Pipita-a, ma adje eli kpekpeke ayie abhúlá.
Eli ang-o adù m̀gito me bhiti okpála ngagama
'ngú. U adù apa me:

«Aléluya! Yi toko Ebhe, Ngámá gba ní-o!

A ko m̀kobho, a ko Ebhe na sangu , a ko
Ebhe na angu!

² Engú aní ngakodho e hana-a, aní ngakokodho
li lelele, a la bhadi ngbingbili.

Padhá de, anga aní akodho 'ngú gba 'ngbé
bhùlù zabhe inde adù nako

asiti 'ndji okpála na doto ne zabhe gba e ko.

Ani atsia agisila engú nabhili obalise gba e li ani.»

³ U atsia apa matá me:

«Aleluya! Yi toko Ebhe, Ngámá gba ní-o!

Ngúwa inde ngakoto bhú gũdhũ-o nga'ũ abhúlá dũdũma ne dũdũma.»

⁴ Obhelesi okpála ndjikpa bhisi ne ká badha bhú dabili bini ne okpála badha na ngangamba-a atutu lipuku o kuto, u atsia adhogø Ebhe inde ngadu pí kiti na ngámá-o. U adu apa me:

«A du moko! Aleluya! Yi toko Ebhe, Ngámá gba ní-o!»

Anokia gba Ndili Kandele-o

⁵ Abhomu-o, eli bini ayie ne li pápá na kiti na ngámá-o. Eli ango-o apa me:

«Yi toko Ebhe gba ní-o, ndu yi obalise gba ani-e hana,

ngayi okpála inde ngamanga ani-o, abana ngayi ongbengbe okpála ne yi odjedjedje!»

⁶ Pipita-a, ma adje tolo mugito me a ngagama 'ngú ne bhiti okpála. Tolo ango-o adu mugito me a ko gili wowo 'ngu, mugito me kpeke mughála ngasusula gae. A adu apa me:

«Aleluya! Yi toko Ebhe, Ngámá gba ní-o!

Padhá de, anga a ko Apí 'Kpí.

Ani ngau maka ngámá.

⁷ Ní kpi ndjili, amba ní du di bhú djali!

Ní dhøø ani!

Padhá de, anga nedhinga na anokia na kuva gba Ndili Kandele-o akolo,

wala* ani aleke lie aleke.

⁸ U aha bongo inde na kpéke mase pi ani.
Zi bongo ango-o ngasɔ masɔ, zibotɔ bini tété
ade.»

(Bongo na kpéke mase bhomɔ-o ngasuno me
okpála gba Ebhe-e amene obabadha kulu lio pi
ani.)

⁹ Abhomɔ-o, andjelu-o apa mɔma me: «Ye
engú inde-e me: <A ko djali pi okpála inde u
a'i o bhú anokomia na kɔva gba Ndili Kandøle-
o!>» Ani atsia apa matá mɔma me: «A bhomɔ-o
okukulɔ eli inde ayie ka Ebhe-o.»

¹⁰ Abhomɔ-o, ma atutɔ lipukɔ ma kuto bhú li
'dhu ani ngú nadhøø ani. Engú bini, ani apa
mɔma me: «Mo oméne mo-o de. Ma ne bali gba
Ebhe maka mɔ. Ma bhadi maka ondaise mɔ inde
ngakpokpo kukulɔ 'ngú inde li Yesu ambamba
'ta e-o. Tutɔ mangbo lipukɔ mɔ kala Ebhe.»

Padhá de, anga ngbili 'ngú inde li Yesu
akpokpo e ngaha angu pi opolofeta ngae.

*Kpála inde adɔ pí punda na bubu-o aha 'gú ne
obhulɔ yala gba e*

¹¹ Pipita-a, ma au kokpí abhulu lie. Abhomɔ-
o, punda bini na bubu akoto. Kpála inde adɔ
pépé-e, adɔ 'li ani me: «Kpála inde ngamene
kulu lie pi Ebhe ne bua e bini.» Ani ngakodho
'ngú ngbingbili, ani di ngagu egú bhú ngbili 'ngú

. ¹² Djila ani adɔ nade maka zi djua. Adɔ di bhú
'ndji ani ne ondata na ngámá bhelé. U aye 'ili

* **19:7** 19:7 Ndili Kandøle ne wala e: Ndili Kandøle-o, a ko
Kilisito , wala ani-e, a ko Piga gba Ebhe. Tsia bhú Efe. 5:25,
32.

bini li kute ani. Ani ambila bha bini 'ta 'ili angoo ngae.

¹³ Ani adyi koti bini inde u azi e bhú ngute-e li kute e. Adu 'li ani me: «'Li Ebhe.» ¹⁴ Osudha na abhúlá adu akpata ani me u nde a'u'u pí opunda na bububu. U adyidyí obongo na kpéke mase. Bongo angoo adu bubu, zibotu bini du tété de. ¹⁵ Mbotia inde li 'bhø e adu bebedhe-e adu akoto bhú 'bhø ani. Mbotia angoo adu ngubula nabhili opiga ne di. Ani aú pí 'ndji uo ne angu e hana. Ani tsia pí vino bhú 'ngbé ngbøngølø na ke 'ngú gba Ebhe Ngámá Apí 'Kpí-o. Ke 'ngú angoo adú nadula madula.† ¹⁶ U aye 'ili bini li koti gba ani di ne pí 'ku ani. U aye 'ili angoo me: «'Ngbé NGÁMÁ GBA ONGBENGBE ONGÁMÁSi, NGÁMÁ GBA ONGÁMÁSi.»

¹⁷ Pipita-a, ma au andjelu bini, alu tu ela. Ani asula kpekpeke pí ndu odhu hana inde adu adholo abhúlá tsutsu naali-e me: «Yi go po bhúla yi ngú 'ngbé anokomia gba Ebhe-o! ¹⁸ Yi go zu mbilika ongbengbe ongámási ne ongámási gba osudha di ne osudha. Yi go zu mbilika opunda di ne mbilika osudha inde adhudhuku ne di-o. Yi go zu mbilika okpála, abana i du obhende bhú bali ne obhe bhú bali ade-o, abana i du odjedjedje ne ongbengbengbe.»

¹⁹ Abhomu-o, ma au enu inde i de akoto bhú 'ngbé 'ngu-o, ne ongbengbe ongámási na doto, bhú dabili bini ne osudha gba o me u nde apo bhúla o ngú naha 'gú pí kpála inde adu pí punda ne osudha gba e-o. ²⁰ Abhomu-o, kpála inde adu

† 19:15 19:15 Tsia bhú Ets. 2:9.

me ani nde a'u pí punda aholo enu-o bhú dabili bini ne polofeta na eu inde adu nani amene ongamba 'ngú li djila ani-o. Ani adu nani amene ongamba 'ngú bhomu-o ngú nato okpála inde u aye nani tele gba ani-e li kute o bhú ngita, inde adu di adhogò kulu ani-o. Kpála bhomu-o abhike enu-o bhú dabili bini ne polofeta na eu-o bhú dé djua na baluti. Ani abhike uo bhúbhú me u nde mu de. ²¹ Ani atsia abhili osudha gba uo ne ngise inde adu akoto bhú 'bhø ani-o. Abhomu-o, ndu odhu hana azu mbilika uo. U atsia a'u'u ne di.

20

U agbite Satana ngú kalanga kètø bini

¹ Pipita-a, ma au andjelu bini ayie abhúlá, ani atsia akø píla doto. A adu sakpa ani ne lifungula na tsu 'du-o. A adu di sakpa ani ne 'ngbé gbindjili na ngbéngbé. ² Ani ago aholo 'ngbé kpulu na didili-o. 'Ngbé kpulu ango-o, a ko Satana inde djabulu. Andjelu ango-o agbite ani ngubula kalanga kètø bini. ³ Ani abhike ani bhú tsu 'dú. Ani adho bhøbhø nganda ani, ani atsia aye balua pépé. Balua ani aye e adu me, ngubula kalanga kètø bini-e, ani ngbingi matá 'ndji okpála de. Pipita-a, u atsé mbo 'kpa li ani ngú nedhinga bedi.

⁴ Pipita-a, ma au okiti na ngámá. Okpála inde adulu pépé-e, u aha pi uo angu nakodho 'ngú gba okpála. Ma au di bua okpála bhende u ava nani ngulu o ka u abhuka kukulu 'ngú inde li Yesu ambamba ta e di ne 'li Ebhe lie-o. U dhogò nani enu-o de. U dhogò di kulu ani-e de. U ye di nani

tele gba ani-e pidi uo, i dũ di-e li 'kpa uo de. U azuku matá, u atsia aũ ngámá bhú dabilì bini ne Kilisito ngubula kalanga kètò bini. ⁵ A bhomũ-o bhũtsibhũtsi na bini me Ebhe zuku okpála-o. Okpála bhe koko adjéke ngaiza me kalanga kètò bini-e le paká, li Ebhe tsia zúku uo. ⁶ A ko djali pi okpála inde azuku bhú ká okpála inde li Ebhe azuku o kalanũ bhomũ-o. A ko okpála gba Ebhe, la di-e, nakpi na bhisi-e ne angu pí uo ade. U adú odimandò gba Ebhe di ne gba Kilisito. U aũ ngámá bhú dabilì bini ne ani ngubula kalanga kètò bini.

Satana ati

⁷ Li kalanga kètò bini-e de ale-e, u gbé Satana bhú tikpũ gba e-o. ⁸ Ani tsia nú napite opiga inde agbolo pía doto libhomu. A akũnda napa me nayie bhú Gogo nakolo bhú Magogo.* Ani apó bhúla uo ngubula gbele. U tsia dú bhelé nane sike lingo 'ngbé 'ngu mane. ⁹ U abha doto libhomu, u atsia asa bili li omaha Ebhe apo bhúla o lie-o. U atsia asa di gũdhũ gba okpála li Ebhe akũnda o-o. Engú bini, djua ayie abhúlá, atsia ago atsulu uo hana. ¹⁰ Abhomũ-o, Ebhe atsia atũmba djabulũ, kpála inde adũ nako napite uo, bhú dé djua na baluti nganda enũ-o bhú dabilì bini ne polofeta na eu-o. U adú nazũ likabhu oo ngbikpi ne sukpe dũdũma ne dũdũma.

Lele maka li Ebhe akodho 'ngú na soso-o lie-o

* **20:8** 20:8 Gogo ne Magogo: A ko 'ili ngú nasuno obhũlũ yala gba omaƿsalaeele.

¹¹ Pipita-a, ma au 'ngbé kiti na ngámá bini me kpála bini nde adu pépé. Kiti ango-o adu bubu. Kokpí ne doto akpekpe de ani tsutsu. Kpála tsia u matá uo de. ¹² Abhomu-o, ma au okpála inde amu-o, ongbengbengbe ne odjedjedje, alulu kala kiti na ngámá-o. U abhulu obhuku. U atsia abhulu di bhuku koko, a adu bhuku na mukobho-o. Abhomu-o, Ebhe atsia akodho 'ngú gba okpála inde amu-o nakpata lele kulu gba uo-o, nakpata engú inde u aye e bhú obhuku-o. ¹³ 'Ngbé 'ngu azie okpála inde amu inde adu bhúbhú-o. Kuo ne kuti gba okpála inde amu-o azie di okpála inde adu agba uo-o. Abhomu-o, Ebhe atsia akodho 'ngú gba kpála ne kpála nakpata lele kulu gba e-o. ¹⁴ Abhomu-o, Ebhe atsia atumba kuo bhú dabili bini ne kuti gba okpála inde amu-o bhú dé djua-o. Dé djua bhomu-o, a ko nakpi na bhisi. ¹⁵ Abhomu-o, ndu kpála hana inde u ye 'li e bhú bhuku na mukobho-o de-e, u abhike ani bhú dé djua bhomu-o.

21

Ebhe abhó ndu 'he hana ne toto

¹ Pipita-a, ma au kokpí na mbia ne doto na mbia, anga kokpí na kalanu ne doto na kalanu-o andjia. 'Ngbé 'ngu du matá di-i de. ² Ma atsia au gudhu na bubu-o ngayie abhúlá. Gudhu ango-o, a ko Yelusalema na mbia. Ebhe atima gudhu ango-o ngae. A adu akø kuto me a nde bedhe maka ølø inde aleke lie ngú nanu nakø lie ne 'ko e. ³ Ma adje kpála bini ngatobhila kpekpeke li

pápá li kiti na ngámá-a adu li e me: «Mbia inde-e dabili nadu gba Ebhe-e bhú ká okpála. Aní adú ne uo, u tsia dú omaha aní. Ebhe ngae makpe adú bhú dabili bini ne uo, aní adú Ebhe gba uo. ⁴ Aní akúo ndu ngula sa kula uo hana, okpála mú matá-a de. Engú na da kuo dú matá-a de, egbá dú di-i de, likabhu dú di-i de, anga doto na kalanu-o nde andjia.»

⁵ Abhomu-o, kpála inde adu pí kiti na ngámá-a atsia apa me: «Mbia inde-e, ma ngabho ndu 'he hana na mbia.» Pipita-a, aní apa muma me: «Ye 'ngú inde, anga eli ma ngapa e-e, a ko kukulu 'ngú, inde a ayo la di me okpála bhuka e ko.» ⁶ Aní atsia apa matá muma me: «A amene lie amene! Ngama-a, ma ne Alafa di ne Omega. Ngama-a, ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana. Kpála inde lie ne gumu 'nguo, ma ahá engu nandji mandji pi aní padhá bhú kpongu inde ngaha mukobho. ⁷ Kpála inde agbóko egú-o, ma ahá ndu 'he bhomu-o hana pi aní, ma adú ne Ebhe gba aní, aní tsia dú ndili gba ma. ⁸ La pi okpála bhende ngamene siti 'ngú-o, dá uo abhú dé djua na baluti na dudu ma ne dudu ma. A bhomu-o nakpi na bhisi. A ko okpála namene ngua siti 'ngú inde: obhulu tsulu, okpála ayala nabhuka, obhulu namene zabhe, obhulu nabhelo kpála, obambakuya, obhulu kelo, obhulu nayo oebhe na eu, ne obhulu eu.»

Yelusalema na mbia

⁹ Abhomu-o, sũka oandjelu mananika inde adu sakpa o ne okópo mananika, inde abedhe ne olikabhu mananika na soso-o ago apa muma me: «Gogo, ma nu suno elø na kuva-a pi mu. A ko wala Ndili Kandølo-o .»

¹⁰ Bu Bhobua ago abedhe ma, abhomu-o andjelu-o anu a'o ma pi 'ndjá 'ta. Eta ango-o adu ngbéngbé. Ani asuno gudhu na bubu-o muma. Gudhu ango-o, a ko Yelusalema li Ebhe atima e ngae-o. A ayie abhúla, a atsia adu akø kuto. ¹¹ Zizi adu asu ka sangu gba Ebhe-o. Zi gudhu ango-o adu nasu má ngingingi mugito me a ko teme* na mase. ¹² Aga inde u asa e li kukute-e adu ngbéngbé, di ndjándjá. Bhøbhø adu tété ndjikpa ne ká bhisi, oandjelu ndjikpa ne ká bhisi atsia adu nalilila. U atsia aye 'li opiga ndjikpa ne ká bhisi na Isalaele-e tété. ¹³ Ne ndu pasu hana bhøbhø adu tété bata: bata ne ndjongu, bata ne kati, bata li pápá na abebe, bata li pápá na yoyoko. ¹⁴ U ayiki aga bhomu-o pi oteme ndjikpa ne ká bhisi. U atsia aye 'li obhulu titima ndjikpa ne ká bhisi gba Ndili Kandølo-o tété.

¹⁵ Andjelu inde adu apa 'ngú muma-a, adu sakpa ani ne mbamba na olo inde ani adu napima ne e gudhu-o, ne obhøbhø, di ne aga ango-o. ¹⁶ Gudhu ango-o adu ne odjedje badha. A aviti bhú 'ndjá ne bhú bá, ne bhú 'ngbé-e bini. Li andjelu-o apima gudhu-o lie ne mbamba gba e-e,

* **21:11** 21:11 Teme: Bhú eli na giliki-e, u aye me «Teme na djasepe ne kilisitale.»

mbamba-a ali bhúbhú bhùtsibhùtsi kètè 12† ne ká bhisi ne ndu pasu hana. ¹⁷ Ani apima di aga-o, mbamba gba ani-e ali bhúbhú bhùtsibhùtsi kètè 144‡ bhú 'ndjá abhúlá. Ani apima bha maka li okpála apipima 'he lie-o.

¹⁸ U ayiki nani aga ne teme inde u a'i e me djasepe. Gúdhú-o libhomu adu ngili olo. A atsia adu má ngilili maka tsupa na bubu. ¹⁹ Oteme inde u amene 'dhu aga na gúdhú-o ne e, u aye nani tele tété ne ndu dju oteme na mase hana: bhe na bini-e adu teme na djasepe, bhe na bhisi-e adu teme na safile, bhe na bata-a adu teme na kalaseduane, bhe na badha-a adu teme na emelode, ²⁰ bhe na bhuluvue adu teme na saladuane, bhe na madhia adu teme na kolonoline, bhe na mananika adu teme na kilidjolute, bhe na madjina adu teme na belile, bhe na odukpabini-e adu teme na topadje, bhe na ndjikpa-a adu teme na kilidjopaladje, bhe na ndjikpa ne ká bini-e adu teme na yasete, bhe na ndjikpa ne ká bhisi-e adu teme na ametisite. ²¹ Obhoti ndjikpa ne ká bhisi-e adu omayaka ndjikpa ne ká bhisi. U abho nani bhoti bini ne bini li lí mayaka bini má kpikili! 'Ngbé 'hi kpadji na gúdhú-o adu nani ngili olo. A atsia adu má ngilili maka tsupa na bubu.

²² Ma u belegu 'ngbé 'ti Ebhe bhú gúdhú bhomu-o de, anga Ebhe Ngámá Apí 'Kpí ngae

† **21:16** 21:16 Mbamba bhùtsibhùtsi kètè 12: Gúdhú bhomu-o adu bhú 'ndjá-a masikpe de kilometele kètè bhisi ne 'he pépé ndu pasu hana. ‡ **21:17** 21:17 Mbamba bhùtsibhùtsi kètè 144: A ko masikpe de metele ndjikpa mananika ne ká bhisi.

makpe bhú dabili bini ne Ndili Kandøle-o ne 'ngbé 'ti Ebhe ang-o ngao. ²³ Gũdhũ ang-o dũ ne gumũ ela abana di epe ngú naha zĩ kpĩ oo de, anga sangu gba Ebhe-e ngasũ zi e oo ngae, Ndili Kandøle-o la di ne tala ang-o ngae. ²⁴ Opiga na doto adú adhũkũ li zĩ gũdhũ ang-o. Ongbengbe ongámási na doto tsia gó di ne tia gba o bhú gũdhũ ang-o. ²⁵ Obhø bhoti na gũdhũ ang-o adú ndũ nedhinga hana bábá, u ní galikpe-e de, anga ekpĩ bí galikpe oo de. ²⁶ Opiga na doto adũ nali bhúbhú ne sangu di ne obabadha tia gba o-o. ²⁷ Ehe bini na sisiti lí oo de, abana okpála namene engú inde li Ebhe ayala e, abana obhũlũ eu. A alí bha bini oo ne okpála inde u aye 'li o bhú bhuku na mukobho-o, bhuku gba Ndili Kandøle-o.

22

¹ Pipita-a, andjelu-o asuno mũma ngade 'ngu inde ngaha mukobho pi okpála-o. Ngade 'ngu ang-o adũ má ngilili maka tsupa na bubu. A adũ ayie li bili li kiti na ngámá gba Ebhe ne Ndili Kandøle-o adũ li e-o. ² Engu ang-o atsia adũ akpe li 'ngbé 'hi kpadji na gũdhũ na bubu-o. Ne ndũ pasũ bhisi na ngade 'ngu-o hana adũ tété ne ndula inde ngaha mukobho. Ndula ang-o ngali lílí bhũtsibhũtsi ndjikpa ne ká bhisi bhú kalanga bini. A ngali lílí bhũtsibhũtsi bini ndũ epe bini ne bini hana. Kpákpá-a atsia adũ nateteke ngũbula nakobho okuo gba opiga.

³ Ohe inde li Ebhe tú matá pødjø li e, lí bhú gũdhũ ango-o de. Kiti na ngámá gba Ebhe ne uo ne Ndili Kandølø-o adú bhú gũdhũ-o. Obalise gba Ebhe-e tsia dú nadhøgø ani. ⁴ U aú bhúla ani, u tsia yé 'li ani pidi uo. ⁵ Sukpe dú matá-a de, u dú di matá ne gũmũ zi tala abana zi ela de, anga zi Ebhe Ngámá asú pi uo ngae, u tsia ú ngámá dũdũma ne dũdũma.

Nago ka Yesu

⁶ Pipita-a, andjelu-o apa mũma me: «Ongú inde ma apa e, a ko kũkũlũ 'ngú inde ayo me okpála bhuka e. Ebhe Ngámá inde ngato 'li e bhú opolofeta-a , atima andjelu gba e ngú nasuno pi obalise gba e engú inde ayo me akolo mbia inde-o.»

⁷ Yesu apa me: «Gbo 'dje mũ, Ma ngago mbia inde! A ko djali pi kpála inde ngalila ongú inde li Ebhe ambamba ta e bhú bhuku inde-o!»

⁸ Ngama Djaa , ma adje ongú bhomũ-o ne 'dje ma, ma atsia au di ne djila ma. Pita nadjedje ne nauu-o, ma ati bhú li 'dhũ andjelu inde asuno ongú bhomũ-o mũma-a ngú nadhøgø ani. ⁹ Engú bini, ani apa mũma me: «Mo oméne mo-o de! Ma ne bali gba Ebhe-e maka mũ. Ma bhadi maka ondaise mũ inde ngakpokpo kũkũlũ 'ngú inde li Yesu ambamba ta e-o. Ma maka ndũ okpála hana inde ngalila engú inde u aye e bhú bhuku inde. A ayo mangbo me mũ dhøgø Ebhe!»

¹⁰ Pipita-a, andjelu-o apa mũma me: «Mo owó ongú inde li Ebhe ambamba ta e bhú bhuku inde-e de, anga nedhinga ngú namene lie ka ongú ango-o akolo masikpe. ¹¹ A ayo me kpála

bhende ngamene siti 'ngú-o nɔ bha nedi ne kalanɔ, kpála bhende ngamene engú inde li Ebhe ayala e nɔ bhadi nedi ne kalanɔ. Kpála bhende ngamene ngbili 'ngú nɔ bhadi nedi ne kalanɔ, amba kpála bhende ngamene engú inde nganga li Ebhe-e nɔ bhadi ne di ne kalanɔ.» ¹² Yesu apa me: «Gbo 'dje mɔ, ma ngago mbia inde! Ma ngago sakpa ma ne makalá inde ayo me ma ha e pi kpála ne kpála nakpata lele kulu inde ani amene e-o. ¹³ Ngama-a, ma ne Alafa di ne Omega, a kɔnda napa me ma ne kpála na kalanɔ, ma la di ne kpála na soso. Ma ne Kpála inde akpo lita ndɔ 'ngú hana, ma di ne Kpála inde abú ta ndɔ 'ngú hana.»

¹⁴ A ko djali pi okpála inde ngavulɔ obongo gba o-o. Ebhe Ngámá ahá kpadji pi uo me, u li li obhoti na gudɔ na bubu-o, amba u zɔ di lí 'lá inde ngaha mukobho-o. ¹⁵ Engú bini, ndɔ okpála bhe koko hana, u lí bhú gudɔ-o de. Okpála angoo ngao inde: okpála inde li Ebhe atɔ pɔdjo li o, obhulɔ kelɔ, obhulɔ zabhe, obhulɔ nabhili okpála, okpála inde ngadhɔgɔ oebhe na eu, di ne ndɔ okpála hana inde ngakpi ndjili li eu, inde di ngapa eu-o.

¹⁶ «Ngama Yesu-o, ma atima andjelu gba ma ngú nago nambamba ta ongú bhomɔ-o pi yi bhú oDadjua gba Ebhe-o. U azu ma bhú piga gba 'ngbé ngámá Davidi. Ma ne ikɔpala inde asɔsɔ kɔkpi-o.»

¹⁷ Bu Bhobua ngauo ne elɔ na kɔva apa me: «Gogo!»

A ayo me kpála inde adje engú inde-e pa di me: «Gogo!»

A ayo me kpála inde li e ne gũmũ 'ngu-o gógo.

A ayo me kpála inde li e ne gũmũ engu inde ngaha m̀kobho-o sia padhá.

Engú na soso

¹⁸ Ngama Djaa, ma ngagbele 'dje ndũ okpála hana inde ngadje ongú inde li Ebhe ambamba ta e bhú bhuku inde-e me, li kpála bini 'o engú koko pépé-e, Ebhe 'ó bhadi ndũ olikabhu hana inde u aye e bhú bhuku inde-e pí ani! ¹⁹ Li kpála bini 'e la di ehe bini bhú ká ongú inde li Ebhe ambamba ta e bhú bhuku inde-e, Ebhe 'é makalá gba ani inde u akpokpo 'ngú e bhú bhuku angoo. Makalá angoo, a ko lí 'lá inde ngaha m̀kobho pí okpála, a ko la di nali bhú gudhũ na bubu-o.

²⁰ Kpála inde alũ pí ndũ 'ngú inde-e hana apa me a ko kukulũ 'ngú-o apa me: «A moko, ma ngago mbia inde!»

Ngama Djaa, ma atsia apa me: «A adũ moko! Gogo, Ngámá Yesu.»

²¹ A ayo me Ngámá Yesu suno bádha bhú 'bu gba e pí ndũ yi hana.

Gandja na Mbia
Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 22 Dec 2022 from source
files dated 29 Jan 2022

aeebbe5f-2bfd-5f52-83b6-35e9c9ce956b